

濮川所聞記卷四

胡珠船先生

張文韓先生原本

楊蔭軒先生

金

淮曉瀾

濮承鈞政

衡

濮

鑽離宜

岳洙傳魯源

述

文

三教院碑記

瑣志

宋陸德輿

載之

嘉禾之長水鄉迤邐而西北有勝叢林曰三教院者旁臨水陸草  
楚之涯上出竹樹龍葱之表乃靈宿大檀待補貢士張君德明所  
建也德明志慕空宗將求明眼宗師開法住持點出頑獷之徒之

佛性時瞻堂遠禪師朝廷屢召問法禮遇特隆道望佈海內方命  
住持靈隱 禮致之卽捨自別墅躬爲畚土築基而四方來施者  
輻輳道途沛然莫禦遂建天人師殿五楹後建藏閣禪堂縱廣稱  
之兩廡庖湏千指可容院成而瞻堂辭世矣至慶元己未浙帥魯  
公榮命徑山癡絕冲公補靈隱法席未幾來往秀州之施茶院而  
茶陵智明古公乃入室高弟久掌書記隨侍丈室時德明年雖髻  
而志願未衰率衆頂香堅請開法冲公纔一枉錫便還徑山留智  
明主院事初院因待瞻堂而建未立署額衆權以三教呼之及智  
明主院乃大書三止以榜其門因請予爲記予再繹之而知智明

立言之旨矣夫三止者三教之止也宣尼曰止至善老氏曰唯止  
能止衆止瞿曇氏止止不須說我法妙難思故院之而以三名焉  
三也而以止定焉然斯院之始也而欲以瞻堂止而瞻堂不止也  
繼也將以癡絕止而癡絕似止而非止也今也唯以古公止而古  
公其果止也耶試請古公下三轉語以救諸末劫使癡絕老冲儂  
轉身不得方契三止之義而始不負其所舉矣遂書此以記云時  
皇宋紹定六年歲在癸巳三月吉旦賜進士出身東宮教授知兩  
浙貢舉官吏部尙書嘉興縣開國子敕封三千戶實食一千六百  
戶陸德輿撰 陸德輿石門人 三教院碑記採入府志金石

三教堂知明禪師行業碑記 紀聞

張德明

智明禪師宋嘉定十一年侍癡絕冲禪師住徑山紹定間遷嘉興之天寧寺禪師志立苦行隱於秀水零宿鄉依檀越張德明結庵道風遠播淳祐間冲禪師遷住杭之靈隱未幾退歸金陵明禪師復遠侍靜修禪悅 初檀越申明郡邑為禪師建一草庵養俟命扁曰三教堂蓋禪師能三教之道也且教有三不同而三教人之心則同也 垂老呼弟子一清于前面命曰出家者本為生死大事了明心 豈有工夫為俗事耶汝輩宜省之不可虛叨出家之名言訖端坐而逝壽七十八一清奉師塔於庵後香

火不絕吁三教堂者前有智明禪師有光于前一清能繼之於後宗門如此可謂祖述得人一不墜也是宜記之勒于石以垂不朽庸書此以記

濮提舉墓誌銘 紀聞

元趙孟頫 子昂

皇元以仁治天下列聖相承視民如傷一夫或飢由已飢之有能出粟以賑者輒予以官其資之崇卑視粟之多寡著為令故雖有水旱之災而無捐瘠之民此堯湯之用心也大德丁未歲大祲濮君明之捐米三千石以食飢者全活無數府上其事遂以應格登仕版焉君諱鑑字明之世居嘉興崇德之語溪卽春秋所謂樂兒

也曾祖考諱敏祖考諱世昌宋承信郎考諱振宋承節郎兩浙東路兵馬副都監婺州駐劄君性明達而處己以謙待士以禮鄉鄰有爭常和合之創佛寺曰仁壽曰福善曰永福曰報恩曰普濟創道觀曰元明又創永安東嶽兩祠爲義塾以淑學徒爲井幹以便行汲爲津梁以濟不通爲櫟櫨以給死喪名山大刹捐金捨田夏設無礙浴冬設無礙粥印施藏經周恤孤寡其樂爲善蓋天性然也初調富陽稅務官繼授將仕郎淮安路打捕同提舉皇慶壬子春馳檄歸家上塚指祖塋之西大樹謂僧曰我死可化於此衆訝其語不祥皆愕眙相視是夏復還官次連日樂飲忽瘍發於項初

以其小而忽之樂飲如故屬方盛暑疾日以劇遂不可爲其卒六月廿有八日也年五十有一喪之歸官吏遮道以祭士民無不嗟惜渡江而南風日恬美波濤不驚抵家僧俗弔者系道梵唄之音不絕於耳爲人所嚮慕若此孤允中不敢違先人之意以是年十二月九日火化於所指之地奉函骨於堂迨今八年允中曰吾非不能葬也顧函存則親存葬則已矣是以不忍也然豈終不葬也耶乃卜以延祐七年十二月二十七日耐葬於祖塋之旁娶沈氏嫡子一人允中也女一人適卜氏庶子三人俱幼繼娶趙氏生一女亦幼孫男二人女五人允中來請銘於余惟君輕財重義益積

而能散者是宜銘銘曰邦本惟民民不可飢發廩以贍固邦之基  
錫以一官禮亦宜之盍躋上壽何止於斯有子承家報其在茲元  
翰林學士承旨榮祿大夫知制誥兼修國史吳興趙孟頫撰

古心禪師半葬塔銘

紀聞

曹鑑克明

師諱文鑑姓濮氏語溪梧桐鄉人也先世以資雄於鄉師生而異  
稟柔而表剛早喪父卽屏斥華靡遐然起方外想兄母適許里中  
富室毅然曰欺我無父耶而以身售於人甫十四斷葷戒穢從比  
邱尼教誦其法而習之又二年日欲祝髮兄母卒不能奪遂棄族  
往禮廣福福禪師爲法嗣復授記於天目中峰本公所得尤遂亡

何福住湖之郡以師主其藏室尋歸故山因念慳嗇滋殖吾佛所  
戒莊嚴無著何害於法於是倒其儲橐卽其所生屋廬之旁建大  
佛刹請於朝敕賜福壽禪寺金碧香花日率其徒精修慧業以古  
心自號暇則歸省其母一如在家時如是者十年至治間廣福虛  
席大衆及諸檀主以狀聞於宣峰請師住焉寺當南北衝僧行千  
餘指清規淨約歷七年如一日至順庚午秋七月偶被疾歸福壽  
寺轉劇病且革跏趺堅坐了無戀滯前其徒歷敘平居行實訖怡  
然而逝師生於至元己丑二月十有七日歿於至順庚午七月十  
有六日越三年秋九月其上足弟子如淨以其骨分葬福壽方丈

之北廣福退居之東南隅從治命也前一月如淨以狀來請銘余  
往年將赴集賢之詔舟次語溪師聞之肩輿來謁語次從容以其  
師福禪師塔銘爲託余未之諾也今師往矣意者師之先識將無  
以此易彼耶淨之請誠不忍拒故銘炯炯古心質柔志剛不欲穢  
濁以當秕糠幼耽佛乘脫去簪珥載參載謁悟彼貞指廣福嶽嶽  
創始宋遷師其主之秩秩後先旣築福壽便母之養朝唄昏定寒  
燠靡曠已康何嫌藏爲荼毒魂逐流火逝彼乾竺語溪桐鄉巍焉  
二坵我銘用昭千載斯遊元集賢侍講學士中奉大夫曹鑑撰翰  
林學士承旨榮祿大夫知制誥兼修國史趙孟頫書并篆額至正

辛卯年十二月吉日如淨立石

雪筠齋記

誌略 府志古蹟雪筠齋元漢  
敬之建 釋克新有題辭

釋克新 仲銘

橋李濮君敬之扁其燕居曰雪筠齋或以爲白太傅謂竹本固固  
以樹德竹性直直以立身竹心空空以體道竹節貞貞以立志此  
竹之常也濮君不取乎是而曰雪筠者其必有說乎雪廬子曰大  
凡達識之士取物以名乎居室者將朝夕觀省以爲砥行礪名之  
鑑非徒爲娛適之奉而已夫竹平時無以異乎凡草木及夫嚴冬  
沍寒飛雪彌天積白盈尺萬卉摧壓失其故常而竹獨蒼然益翠  
挺然不撓此竹之變也有似乎君子處時之變鈇鑕在前鼎鑊在

後而志愈厲行愈堅而不可奪也濮君不取竹之常而取其變也  
豈徒然哉蓋所以為砥行礪名之鑑焉耳濮君嘗為郡推官與余  
有從遊之好故因其請而推其意之所以異於白太傅者如此

桐香室記 桐邑志

楊維禎 廉夫

宋著作郎濮雲翔從高宗南渡卜居濮津之梧桐鄉始居成聚已  
而成市其土廣而墳無高山大谷之深阻所植多嘉樹美箭舊說  
有梧桐甚大鳳凰嘗集其上故鄉以桐名余弱冠時嘗遊覽焉曾  
識濮氏樂聞公之折節下士尤切切教子弟不遠千里而聘名師  
其子仲溫好學不倦題其脩業之所曰桐香蓋取詩人李長吉語

以名也後余在吳有為典市官者日中與市者相質劑夜則歸讀  
書石轆且嘗遺書於余道其所志欲請業焉則知為仲溫余訝其  
人生統緒家且既仕而又志學如此非賢者能之乎已而仲溫棄  
官還家尊師取友以卒其業余在雲間仲溫又介余友鮑仲孚招  
徠余公觴余知止堂上仲溫退侍余桐香室中相與校讎經籍商  
論文墨為事瀕別請室記昔屈子著離騷以香草比有德之君子  
傷香草而不芳者有矣而未聞以桐蓋卉之弗靈于性者不穠於  
色則烈於香不烈於香則厚於實而已耳惟桐性靈花之折葉之  
落占歷者以之而其枝之所傾有以集鳳凰材之所取有以中琴

瑟詩人以香屬之殆不可與凡卉之臭味同議矣故曰桐之香鳳之集也噫桐之香鳳之集德香而爵祿集理之所必至者仲溫植其德如植桐然自拱把之日無牛羊斧斤之戕勢不至干霄蔽日不止也根益深蔭益大香益遠吾見仲溫膺爵也天子賜進士第起家以顯揚其親展布其平日師友之學更有涯涘乎哉故余樂爲記使人知桐香非直爲集鳳之具實濮氏之德之符也繫之詞曰梧桐生只在濮之陽桐之香只翳鳳之翔翳鳳之翔維君子之鄉梧桐培只在濮之除桐之香只伊德之符伊德之符維君子之居

松月寮記

桐邑志

楊維楨

鐵崖

去秀之西門外三十里所其聚爲濮市濮公子仲溫氏之世居焉居有前後邸第義莊塾以教養里之才子弟仲溫自幼從師學明經旣通尙書後學易又從余學春秋兩充鄉試兩不赴適丁時變遂作道士冠裳尋山澤間欲挈妻子爲鹿門之舉事未遂則闢寮一所植松數章高秀蒼古若深山木客之出在市廛仲溫與之俯仰嘯咏若友焉天清氣明月在松頂仲溫彈琴松下琴餘讀道書作遊仙咏不知身世在黃塵市而在白玉宮闕也遂以松月道人自號雲間盛懋旣爲圖之而又寄自作松月詩一篇於余徵文爲



記余爲論積陰之氣清而久者在天爲月麗月之清於物之秀者在木爲松桃之得於月也清而妖柳之得於月也清而蕪惟清而秀秀而已治於月也清而婁梅與竹之得於月也清而癩惟清而秀秀而已治者松之得於月也以此然得月之得而見諸名人者自唐常建後未聞其人焉建之詩曰松際露微月清光應爲君噫此建之得於松月者未易與俗人道也去之五百年而仲溫氏復得建之得而其詩有曰丈人夜開關涼月在松頂此其得於松月之得者奚減建也哉嚮使仲溫氏早時壅官或至五年十年卽不壅不過趨馳風塵中志不直達而性光先有損其能哦松哦月而有得哉嘻仲

溫氏之彼失此得其有能辨者已書之寮爲記至正十三年癸巳七月七日

環碧堂記 紀略

明 貝 瓊 清江

樵里南五十里爲幽湖巨族朱顯道氏世家於此築堂若干楹而水周其下題之曰環碧前御史中丞番易周公伯溫以大篆體爲書三大字復馳書鳳陽屬記于予初予主顯道嘗愛幽湖之奇勝蓋脉絡自南湖洄而爲澗旋而爲渦至是左右回抱青停黛蓄尤形勝之所萃焉使其奔放莫遏則悍而可懼渙散旁流則弱而易狎又何足以爲奇勝也觀其方春雨止波瀾浩浩與天相涵不見

洲渚而王睢翠碧往來其中景之觸于前者何如也及清秋之夕魚龍在壑衝風不起顛倒星月而舟人漁子擊榜歌呼景之會於心者又何如也方全盛時並湖而居者非一飛樓湧閣雖南湖不足侔其壯麗而堂據一湖之要蓋有無窮之趣焉時方縻於王事遂舍之而去客京師者二年分教中都者三年汨沒埃壘之中未能有其一曲以從耕釣而徒懷想於二千里外今為顯道之所專也按朱氏世為樵里人其始祖某宋文林郎侍科院官其子思明仕元為進義縣縣尉轉嘉興縣錄事司判官思明之子青陽教諭仁甫先後相繼逮顯道已四世矣今一境既剝於兵此堂復葺而

新之挹空翠於几席之間來清颺於笑歌之頃固可以盡四時之樂益見文獻之家與幽湖同一悠久也顯道業攻醫得九鍼補瀉法于金華玉瑞庵實出竇文貞公之傳故非一時庸工所及性尤急於治人而人賴以全者甚眾則天之報施又可必者矧諸子若孫讀書好古予知後益隆不替非止於是而已異日解組南歸艤舟幽湖重登環碧之堂又當述而賦之云

糜母張氏孝節傳 紀聞

貝瓊 吳琚

樵里之幽湖張氏女歸同里糜正生二子而寡時年二十有六誓養舅姑不再適舅姑歿粥衣而葬二子既長告以父志俾從師讀

書遂以儒名於世咸稱張之教也至五十七終貝先生曰婦之事夫猶臣之事君惟貞與信而已貞則不墮其節信則不貳其心然上下數千載之間求之千萬人之中如衛其妻者千百而什一也有元之興聞其妻之風奮於閭閻克盡貞信者非一而余之所知者京口之王氏新安之吳氏尤較然著明者也當是時朝廷清明方將以貞信之行勵化率俗故有司特上其事咸旌其門斯為盛典已若山嘯海聚素無詩書之習而有貞信可稱者則姑胥王珩之母橋李糜實之母焉實母於夫之歿也堅執婦德歷三十年之久凜然如秋霜烈日使死者作於九京則見之而色不忸心不餒

其去自淪於禽獸者奚啻萬萬視其妻亦何遠耶屬四方有戎馬之事不得上請而旌之以為天下勸然其貞信見於士大夫之詠歌者又可得而掩之哉當與京口之王新安之吳並立於天地爭光於日月矣吁以一婦人之賢足以表之於世不與草腐木斃矧烈丈夫不失事君之義者乎世降俗媮甚者叛於利害之頃未有死生一節如婦人者抑可歎也夫亦可歎也夫

濮節婦詩序

桐邑志

徐一夔

大章

濮節婦者崇德梧桐鄉濮宗海妻也姓劉氏守節自誓國朝旣混一崇節義以變移風俗節婦應行旌表里長者咸曰不可使節婦

之賢行未著上其狀於縣縣上之會府會府上之禮部未報里之長者又相與言濮節婦之賢行未著比閭族黨之間適有不幸如濮氏者無所取法願得能言之士加詠歎焉庶幾有所感發得詩若干首乃相率踵門徵予言以序初節婦年十七而歸濮氏又十有一年而夫亡垂絕時語節婦曰吾行與汝訣矣我有老母在堂兒方髻亂汝能養我母使我兒得有成立乎節婦嗚咽不能對其夫既沒節婦所以養其母與撫其孤者一如遺命久之有諷之嫁者曰人之生世信如輕塵棲弱草不於盛年時思所以自處何乃自苦爲節婦曰婦人之義一與之齊終身不改設我棄其母與孤

而念他姓他日何以見吾夫於地下願勿復言時方亂所至掠人婦女無算節婦本巨家子懼不能自全盡脫簪珥服飾蓬髮垢面穿大布之衣督僮僕治耕桑狀類農家婦暴卒有過其里者皆不顧而去節婦之處亂世其善自爲防大率類此故能奉其姑以壽終撫其遺孤至於長大今年近六十人稱之曰節婦云嗚呼濮節婦能砥節勵行於兵戈搶攘之時及其老也獲見太平之盛不其幸哉旦夕璽書南下翼然綽楔起於墟里之間有光榮矣柏舟之詩爲衛其姜守義而作孔子存而勿刪敦教化也詠歌風人之職因不讓而爲之序

濮川八景詩序

瑣志

陳邦獻

橋里之西南壤曰濮川初本荒落元時有豪右濮氏其富不資雄於一郡居民咸聚而依之以貿遷成市流水包絡其間故氏其川爲濮焉嘉郡庠二教姚君廷玉謂予曰吾鄉前輩鮑先生仲孚嘗摘是境勝概謂之濮川八景多有題詠但世變人亡燬滅而不存吾生於是長於是今雖糜祿在外而故鄉景物常在吾目也因繪八景圖將乞善詩者歌咏之庶不泯其舊且以適吾志也予曰八景之詳可得聞乎曰夾川之畔比屋鱗次巨梁虹駕輕烟旭日往來憧憧者則市橋曉色茂林脩竹映帶疎檐時聞伊唔聲出於林

表者則林墅書聲川之北有層觀巍然爲道流之居怪石聳立其側高數仞上鐫翔雲字厥勢崇峻曰翔雲仙觀其右有佛日宮制度宏麗天清而夕照凝輝則金碧交煥鐘磬流音曰落日招提若夫南涇漁艇則曲渠而通乎是川者也扁舟漁父舉網得鱗則移市以供酒客之需西村樵唱則秋原霜後禾黍登場樵者負薪以歸前者歌而後者唱也時若長空一碧波澄烟斂素月涵輝灑氣無垠非幽湖秋月之良夜乎斷岬流澌夕陽殘雪梅影橫斜清香時至非梅涇雪霽之佳致乎予聞而喜曰有是哉子之善狀夫是景也昔柳子厚謫居僻陋憂辱之地而以愚溪八景爲詠爲詩皆

愚其名寓其困苦鬱抑之情耳視子之優遊閒暇適其所天非子厚之侔也且天下之名勝可樂遊者多而能知其所可樂者幾人哉濮川之景人日見之未嘗有知其樂而樂之者亦無異蚊蚋之過吾前也子能知之而樂之且以出仕承明而不忘釣遊之樂是則可賢也已善於詩者宜歌以繫之


按此序所稱八景與宋濂詩題不同而鮑西溪之詩不傳蓋名稱雖殊風土則一正不妨並傳耳

重修福善寺碑記

桐邑志

楊述 宗道

嘉興郡城西一舍許有鎮曰濮院其地介秀水桐鄉二邑間福善寺當其中而專二邑之勝元至大己酉同知濮鑑創以居佛之所



也相傳寺左右有二庵一曰崇福東溟浩上人居之一曰積善月庭生上人居之二上人者智性融通識趣超卓雅為濮公之所尊敬寺成延之上座仍合二庵名名其寺為福善無幾先後茶毘時歷年未多而寺固無恙嗣寺之人懷奇見不得施設者有之而眾弗及知也國朝洪武乙丑寺併叢林僧徒散去山門兩廡僧寮丈室佛閣鐘樓盡廢獨一殿巍然而上漏旁穿亦已甚矣永樂癸巳里之好事者慨茲寺久虛聞今妙用體師住持法喜名山將謝去朋徒結茅歸隱乃率眾延致之人固疑師之不屑而師終不拒既入院攻苦食淡焦思勞神毅然以興廢舉墜為任而師道行高潔

足以起人敬信由是富者捐財貧者助力爰哀衆施益以已橐鳩工庀材夜以繼日是年重修殿宇成越四年丁酉鼎建天王殿塑天王四及加飾諸天十王尊像又三年庚子先大父德順公宦遊京師過潤之金山謂都綱敏機聰公曰寶銘期堂公昔棲禪室也自公典教大邦日就傾圮失今弗圖恐後無及矣聰感其言問孰可任事者卽以師名對聰因出綵緞二貽書屬師改作之師遂闢西偏隙地因舊爲新建爲大悲殿增創傑閣其前而規制益宏焉宣德丙午他寺有鬻巨鐘償官租者銅以斤計凡千三百餘直白金百三十兩有奇師甚欲購之而窘於錢旬月間里人施予者相

踵旣酬其值仍以餘資構樓覆之正統己未千佛閣成爲間者五高深廣袤咸中尺度峻宇重簷隆棟厚礎可經久而不廢明年刻大毘盧像千佛法身塗以黃金安奉如式庖廩湯園之房與凡事佛奉僧器用靡弗備其制之所宜有而伸其志之所欲爲矣歲戊辰又樹二綽楔於通衢南曰江南福地西曰浙右名山以表茲寺之勝往來觀者咸謂二額蓋狀其實云先是寺非大刹住持非正員體師居此前後四十三年下扶宗教上祝國釐而遠邇之人瞻依歸戴是雖俗尙嚮善而然抑亦師之盛德有以感化之也聖朝尊崇象教正統中寺僧德琳具興創始末詣錄司自陳遂領檄爲

住持寺今得與大剝齒者德琳與有力焉德琳化去繼主茲席似碧實師門高弟又能心師之心曾未期歲兩廡煥然一新墜壁粉牆悉加藻繪凡師志有未竟者又得次第爲之繼承可謂得人茲山可以增重矣同袍惠公以余知師爲詳而言或可傳信礮石徵文記之惟人之居室將以傳於子孫然有父旣底法而子不肯堂構者學佛之人非有子孫之世守箕裘之踵襲乃能前作後述經營繕葺使仆者以植傾者以扶朽者以易缺者以完而舊觀畢具宗風不墜如此不亦難哉思其創始修復之難而相與保守於無窮是又不能無望於後人也庸摭實書之俾來者有考焉景泰三

年歲次壬申夏四月吉旦奉議大夫遼府右長史桐鄉楊述宗道氏謨

送大尹田公考績序

府志

楊述

浙有郡十一而嘉興爲大舊統屬縣三宣德中大理卿胡公奉敕巡撫東南以地大民衆賦稅夥繁難於剗理請諸朝分嘉興一縣爲三崇德海鹽爲二而桐鄉則崇德之分地也當分縣時若官吏率背公徇私凡富庶之里膏腴之田悉爲崇德有而桐鄉之所治多貧民所徵多逋賦爲令者難其人正統辛酉內江田公德潤以太學生來尹是邑始下車問所疾苦前政有不宜於民者立更之



鋤奸抑強植弱扶善居三載貧民遂有生之樂逋賦無後期之愆方將奏績天曹適以外艱去任瀕行垂髻戴白之人扶老攜幼挽其舟不得去已而闔邑父老連署姓名詣郡乞畱郡上事於藩臬轉而上聞廷議僉曰教民以孝縣令職也太平之世奪情豈令典哉事遂寢公既去繼之者多非才民愈思之不置候公釋禫之京復申前請益力聖天子順民所欲俾再治桐鄉民既得公嬉嬉然如赤子之依慈母公亦視民如子而疾痛痾癢若切於身又三年政以平訟以理簿書雜沓軍務紛紜而公處之若無事焉凡若是者豈聲音笑貌所能爲哉由其存心以恕出令惟公故百里之民

陰受其福有莫知其誰之爲而爲之者矣當六載報政趨朝司訓儲君偕庠友孔瑛皆踵門求贈言予辱公愛厚知公久且深雖不請固所願也方今皇上奉天子民慎擇守令而寄以民社凡有循良之政者率不次用之矧公之才德爲浙東西縣令最郡守知之藩臬大臣知之天官少宰知之者乎魯子敬謂龐士元非百里才使處治中別駕之任始當展其驥足予於公亦云

重修福善寺碑記

紀聞

馮夢徵 具區

濮院介秀水桐鄉二邑去郡城西三十里而遙蓋以濮姓居此得名有同知濮鑑者創精廬奉佛而浩生兩上人實居之先是左右

有二庵浩居左曰崇福生居右曰積善寺成合二庵名之故曰福善入國朝并入叢林遂廢而佛殿僅存永樂間妙用體禪師罷法喜住持歸老於此遂毅然以興復爲事師道行清粹尤善誘接遠近皈依有如慈母以故信施湊集敝者新隘者闢無者創經營三十年而規制大備赫若寶坊故事寺非大刹住持無正員正統中僧德琳具興建本末詣僧錄司自陳遂領檄爲住持寺與大刹齒琳旣化去其體師之弟子似碧念及世守遂徵楊公述文立碑記其事蓋景泰三年夏四月也自景泰迄今百三十餘年矣而殿堂形像半爲荒烟野草南京工部尙書陸公光祖時以太常少卿家

居與其弟舉人光宅見而痛之迺囑寺僧文淵文澗文溥明恩善人姜鳳等經營其事而淵尤勤瘁先衆備嘗艱阻鎮民感其誠無不人人樂施工始隆慶戊辰先期寺僧可傳修鐘樓是年五月修大殿天王殿山門牌樓又建伽藍祖師二殿明年己巳八月建禪堂又明年庚午正月裝大殿內佛像及羅漢諸天後壁觀音等像萬歷甲申五月修千佛閣及兩廡明年乙酉正月裝毘盧佛千佛七月修鼓樓八月復於禪堂左增建明極樓計費千餘金凡十有八年而工畢淵等乃因尙書陸公謁余而請曰茲寺也邀惠長史公而一時興廢顛末幸不泯滅今日之功所賴以不朽者有太史

先生在卽不吝筆頭上光明就此勝緣豈不幸甚嗟乎善哉諸上人可謂有志世守者也方今道法陵夷塔寺之建於先朝者十廢八九卽其一二亦寢就湮沒而不可支於此有人焉獨能以修舉莊嚴爲佛事豈非以優鉢羅花之見於世而象教之幸歟夫如來廣長舌相徧虛空界而衆生迷執未免以緣爲親疎不信自心是佛常恒說熾然說了不能聞而忽見形像殿閣金碧燦爛則合掌低頭懼喜踴躍而從之惟恐後也卽不然而怒罵褻嫚且加謗焉曰此土木偶耳何靈何聖而竭民脂膏以奉之耶此豈謂盡無然謗必受報苦極而悔深其他生之合掌低頭踴躍而從之惟恐後



者又可必也嗟乎此衆生自心之佛因熏而發者也我是以知形像殿閣之說法其緣甚親而諸上人之有事修舉莊嚴順佛慈而延象教其功甚偉是不可無書乃次第其事而揭諸石以附長史公之後云萬歷十四年歲次丙戌正月旣望賜進士出身翰林院編脩文林郎秀水馮夢徵撰文賜進士出身前貴州等處學校副使嘉興包檉芳篆額賜進士及第翰林院脩撰承務郎秀水朱國祚書丹

馮夢徵字開之萬歷丁丑舉南宮第一官祭酒著有快雪堂集

淨土庵中興塔院記

桐邑志

釋廣源 月庵

本庵開拓於趙宋宣和間惠忠禪師爲之鼻祖迄今四百餘稔中

海川所聞記 卷四  
間沿革不可殫述元至大初檀越濮司台見墜緒不振禮請高僧  
楚石琦禪師主之卽構大殿巍然復存厥後嗣非一人香燈不絕  
如縷綫成化庚寅古杭聖果名山無際廣禪師之孫守誠字敬堂  
與其手度弟子宗裕字綽庵駐錫於此德足感人鎮中耆宿遂請  
繼主之舊有居室規制卑隘僅蔽風雨誠與裕毅然以興復爲己  
任古殿震風凌雨勢將阡危首先葺而新之像塑靈山一會華幡  
香燈種種莊嚴靡不如式居無何以丈室卑隘撤而廣之復建松  
月堂及衆寮庖福等室皆一新之復置膏腴田七十餘畝爲香燈  
之需圖遠之謀亦深矣宏治戊午綽庵因出世勝果家山僅三年


搥鼓告退廣無際實臨濟正派染指法味無際傳蓮馥馥傳誠誠  
傳裕裕傳智深深字大淵傳惠惇性初惇度道至天文五世有繼  
述之能淨土之承先引後者可稱得人矣且敬堂綽庵承法以來  
幾四十禩攻苦食淡繇難以致易搏費制羸繇小以暨大信嚮者  
雲輸川委然後大興土木涉歷旣久克底於成非負荷之重曷克  
致此大淵殫力辛瘁仔肩後事重念祖與師中興拮据之勞他日  
歸寂不昭示梗概恐後人漫不知省而忘其所傳之本乃建塔一  
方構樓三楹樓之背鑿竈立塔祖與師之遺骨瘞於其中此深之  
孝也夫教法東流寺祠據山川形勝者在在有之第不能不囿於

數而興廢難免間有廢而復興者貴在負荷得人若今淨土中興孰非負荷之重得人之可徵耶大淵知余與綽庵善而又知出家之詳請文為記勒諸貞珉垂諸永久將欲俾後人知其所自而不忘其本也余非能文者重大淵之孝遂紀之不辭嗣大淵之後者果有感於吾言也夫正德二年歲在丁卯春吉旦江左外史月庵廣源誤并書丹賜進士出身兵部致仕尚書前都察院左都御史進階一品榮祿大夫八十翁同郡項忠篆主祭弟子智深立石

按此記為釋廣源誤項襄毅公為之篆額碑今嵌庵內山門間尚有宋時初建碑埋田中今不復可考矣

張節婦詩序 桐邑志

王世貞 元美



故茂才馮公之與張太夫人訣也實手之曰而殉我身乎乃殉我心微而孰與代吾之為子若父也蓋馮公訣而太夫人隕越不欲全也既而曰有成言矣為死者死則可為生者生則可吾不忍於馮氏之生者也於是馮公之父母老矣有一子今大夫孩僅三齡而其一子敏在腹太夫人出而哭於堂曰從公乎微未亡人孰與代而子也入而哭於室曰從公乎微未亡人孰與代而父也甫輟哭蓋日夜拮据治生而盡斥其生之餘以奉公父母即斥奉父母之餘以資大夫及所謂遺腹者咸就外傳業文事彬彬有成矣馮公之父沒其母朱獨存老而甘太夫人之養忘乎孤且獨也大夫

之兄弟幼而其義方之訓忘乎孤也蓋馮公訣而太夫人之首不飾才珥體不識縷帛三十年如一日也今上隆慶之二年大夫成進士矣而會有詔旌天下之婦而節烈者大夫上書闕下言狀有司覆覈無異上曰俞旌其門節婦如故事大夫繇進士得吾蘇之太倉比二千石太夫人不以子貴而以節婦稱來就養業已六秩大夫謀所以觴太夫人者進之太夫人卻不御曰家不幸而使我有此名卽我觴如若父何固進之乃請以觴公母曰所不卽下從公者以姑在姑幸健善七箸是姑授吾年也始一醕卽以醕大夫曰所不卽下從公者以若兄弟在幸而有成立輝赫其家聲而大

之是若授吾年也雖然若何以報我則又曰毋以我爲也天子過采若言而以旌我我何以報若也精白一心而事之毋使若愧於爲我子州子民若赤子也爲我所以撫若者而撫之毋使我憾於爲若母於我足矣大夫再拜曰謹受教於是州之薦紳士沐大夫澤而高太夫人者合詩以頌屬世貞序其事

岳九德墓表 紀聞

焦 竑 弱侯

余始通籍時輒有意當世賢豪君子聞虞部岳伯子元聲者侃侃朝廷間聲稱藉甚余幸得一當也後三歲壬辰與禮闈拔士之役所薦拔十有五人今客部叔子和聲在焉兩君擅東南之美以球

琳瑯珣並登清廟一時賢士大夫無不倚以爲國器因得悉封公云公諱九德字君采別號心夔少以文雄諸生旣老以子貴封工部虞衡司員外郎上世相州湯陰人宋岳武穆王之後也武穆子續忠侯霖霖子鄴侯珂珂勸農嘉興郡卜城隅金陀坊因家焉著書名金陀粹編以此珂生承事郎覲覲生江夏丞邁邁生監秦州酒庫涇涇生金部主事琳蟬聯華圖世載明德隆然爲浙之望族矣自琳始八傳爲鳴迅鳴迅生商爲東湖公配金氏生封公公少磊落有大節時海寧猾吏以獄中東湖公公前奮曰吾固在也而難吾翁爲卽望誤願以身代比至邑許令天贈者慷慨白其寃狀

立解散去而公遂奉東湖以歸於時徭賦重沓拮据萬狀猶時手一編呶唔不輟與馮開之太史周彥雲孝廉篝燈蕭寺中以大業相期許顧數奇不售乃日討兩子而訓之教飭謹備注意鐫厲威不廢譙呵倦不知遊息迨兩子連翩鵠起而後公喜可知也公執二親喪禮不過而哀有加與弟九臯友愛彌篤不難以愛子和聲後之隱之親終輟事與哀雅春敦俗兒無常父稽之前牒公無愧焉季子金聲與余兒尊生定友於成均亦以文行負俊聲公父子間自相師友處則訓之學出則教之忠娓娓昕夕俾各發聞於時而後已初兩子之令巖邑也公一再臨眠聞風謠藹然輒色喜迨

兩子訊斷時倚柱聽之又未嘗不爽然也蓋公籌閭閻疾苦若不啻觀火然適得兩子以成之故邑人戴為衆父而戴公為父父以此久之元聲登朝持論嶽嶽數與世衲鑿等以島夷封貢之議忤要人竟拂衣歸旁觀者或疑公不樂公笑曰此非乃所知兒所持是也噫此可以知公已居恒與人語莊而氣和無藏怒無馮容日厚施而薄入以為常以萬歷壬寅十月二十二日卒距生嘉靖庚子十二月十二日享年六十有三配封安人張氏卜乙巳正月二十七日葬桃村之原嗟乎太邱之仁隱約於一時而紀謚羣泰貴顯者累世公起詩書之廢疾而世莫見用韞經濟之器業而人未

蒙福安知非留其羸為來者地耶况公重義而無固於位也故子獲遂其強直秉節而無疚於利也故子獲遂其廉明即謂以用公可也元堂有歸衆姻咸會素車丹旆徘徊增哀謂纂懿行垂於後人爰撮其大都表於隧道諸未具者有秩宗陸公之誌在萬歷三十三年歲在乙巳臯月朔旦立

按此墓表馬應圖篆額陳懿典書丹東海徐延平集王羲之書刻之墓在武康山

登仕佐郎鴻臚寺序班擢侍經筵鴛湖濮公墓誌銘 誌略

朱國祚 兆隆

嘗覽郡邑志見故家世系及其人物風采當時所歆豔與夫後代



所稱述輒爲之流連感歎不能已蓋承平日久都人士風物之美能自致寵榮足以見國家恩光之渙渥而孝子仁孫所永思不忘者非直爲一時美談也吾鄉濮氏以孝友賢達世其家至鴛湖公實冠冕昭代其行有足傳者公諱天輝字堯華宋雲翔公十七世孫也祖子奇諱彥英賓筵冠帶重於鄉父竹庵諱椿當世廟時海寇挾東彝縱橫吳越間公以素封長者力助城守禦倭復輸資給官出粟賑饑民當事張公任聞之歎曰義哉其真提舉公之後乎有司上聞旌其義中年始生公公性溫克美丰姿嗜古人書早歲舉茂才食餼成均數奇不遇乃慨然曰嗟乎大丈夫負七尺軀不



出則已出則成大名耳金門黃屋安在不可以自致通顯何必登甲第始酬我生平夫古才名特達之士一見傾動人主取富貴如拾芥彼何人哉乃謂區區科目遂足盡天下士我不信也神宗御極公以雍貢授鴻臚典謁從上南郊祀壇禮畢上從衆官中望見公儀容韶秀甚異之問何方人中官以浙之嘉興姓名對上顧左右曰江南人乃有此白皙特賜酒及絹帛僚友皆賀曰君金玉品顧盼光生能令九重動容舉朝傳爲盛事尋擢侍經筵贊述典故多稱旨上每朝必問白皙官安在公時時近御前上嘉悅賜寵誥褒獎一時呼白哲鴻臚數載公且老倦於職憮然念桑梓遂乞骸

骨歸教子弟讀書治生產宗族貧困者周之值佳候置酒召親故情話款洽時或乘小舟攜飲具往來煙雨間興會所至輒高歌命酌至暮忘歸其慷慨風流蓋老而不衰也後以鄉飲赴大典朱衣白髮面如童子井邑之人知公爲天子所歎美皆欲一睹其容故環聚而觀之距相躡云初公之未仕也家世本厚郡城市廛半屬公業時俗有濮半城之名至是則厭苦塵囂築別業於鴛湖以娛老自號鴛湖主人寄情花鳥泉石以壽終嗚呼其生平可概見矣方公少壯時莫不以爲玉堂中人物及公去位又多以薄宦爲公憾者此何足以知公夫一年少書生卽超然有投筆棄繻之意倘



所謂明月孤映高霞獨舉者非耶觀其時時近上前從容奏對具知典故一時臺閣貴人皆傾慕其爲人而爭與之遊公未嘗私有所結納以故十年不遷其所挾持抱負者何如乎按公生嘉靖壬午六月二日卒萬歷己丑六月二十三日享年六十有八元配錢氏早故無出繼配朱氏封孺人生嘉靖丙申十二月十一日卒萬歷辛亥五月八日享年七十有六二子長翰圻明經授別駕次翰墉太學生余方還里臥病公之長君翰圻來告曰某月日時將有事於窀穸告所曰卜葬於秀水白苧村之上月圻告銘余辭以疾固請遂爲之銘曰溫潤而澤始如處女蔚乎升華終則繩武鳳

匪羣兮疇與伍璞匪衍兮疇與賈返幽宅兮安其壤土子孫振振兮念爾祖萬歷三十九年歲次辛亥季冬吉旦賜進士及第通議大夫吏部右侍郎兼翰林院侍讀學士記注起居經筵日講官通家眷侍生朱國祚頓首拜謨

重修靜庵府君墓記 紀聞

岳和聲 爾律

我高祖梅溪府君奎營葬大父府君懋別號靜庵於桐鄉桑園橋之右方面以父耕雲府君端與仲父樵隱府君澄及己與弟怡菊府君壁耐於昭穆之位穴壬山丙向亥脈入首水纏元武繞青龍由巽以出坎方高壠隆起明堂潄水環之前有橫琴一案互於離

此勝兆也始於宏治之丁巳迄萬歷庚戌一百一十有六歲而及吾兄弟三人始並列仕板則本生考敕封虞衡心夔府君九德以博學困諸生間攻苦督諸兒而嗣考敕封儀制青門府君九臯殫力相之始大厥家歲在乙巳和聲以虞衡喪三年迄事還朝伯兄偕季子送之揚子江干泣然以虞衡府君永訣時拳拳以祖宗姓氏隱約未白亟宜陳改為囑遂草疏於是歲十一月廿二日具奏十二月八日奉旨下所司覆請報可移檄省郡下縣凡我族姓咸改樂為岳環百里內外皆喜靜庵府君之阡至今日而披蒙翳而觀水木人人知為武穆王十二世孫矣先是守者不戒埋墓蕪脉

新松刈柏歲月浸滌弗討厥辜至萬歷壬子之九月盜伐東北二  
隅巨柏五章夷其離岸二尺有咫不得已鳴之邵司馬關粵良公  
驥以懲逆杜漸內外宗姻咸集厥議覆上郡乃赦往戒來清糧贖  
廢而列榜以垂永焉志慎也其合窆於內若怕菊府君之節婦范  
氏遷祔于外若曾伯王父長子成之婦曾氏屏諸叢樁若諸孫某  
某若諸孫婦暨元孫婦某某歸我族之義阡者事屬宗老擇便利  
日月需次以族而夷有培高有增燕有芟隙有蔭圯有葺塞有濬  
而含有築墓田案地有贖有市之屬在我兄弟三人實事而圖終  
云迺以萬歷四十一年之嘉平月十有七日庀材鳩工和聲偕水

部伯兄比部季弟恪共厥事越明年六月六日迄工則伐石以紀  
我子孫世世奉事毋有斃焉記塋堂原地八畝四分今止丈得六  
畝分不得深討內震方地一畝四厘向爲三支從叔一夔府君九  
敘樹桑者除四支諸孫盡義補封柏價二兩外再益之四金不從  
另與之橋左桑地一畝四厘稍腴貴據形家堪爲從伯叔祖平川  
公相吉兆者議易之樹價弗問又議助四支地三分在平川公兆  
北者以葬四支曾叔祖憶梅府君光迅及其子從祖雙橋府君名  
宰爲盡義等祖父二阡乃將震方地伐桑撤廢屋建后土祠其羨  
則築宇居守永不得種作以撓地氣計祭田原田一十畝爲三支

四支收贍瑩糧者已久不可考今伯兄元聲捐田十畝和聲捐田十畝季弟駿聲捐田十畝并嗣考青門府君亦欲捐而未果今續成之者十畝其字圩墳段俱詳誌碑陰其墓田四十畝以贍墳三從曾叔祖光遠府君附子穴在亥方歲久難動代贍厥糧禁後越葬其餘以供兄弟子孫春時祭掃此墓及再遷祖提舉府君之墓曾王父松巖府君之墓於孟冬一日合饗先祠閒歲修葺本墓之費二家子孫歲遞掌之無侵無廢有侵廢者坐以不孝之罪計祠屋舊屋三楹爲梅溪府君所建者以三支曾行修葺今敝壞聽拆去新築二層凡十二間堂寢略備翦封闕游瀦水修河三十丈計

廣河六丈所費鏹與粲共二百六十金有奇而他費不與焉其世室令佃戶居守宗人不得私焉有傾圯則用新捐贍墳之產歲葺之可也時萬歷四十二年歲在甲寅六月六日立石

按墓碑雖存然荒蕪埋沒漸不可讀幸岳氏載入族譜彰彰可考

古三教庵碑記

瑣志

湯齊

齊賢

予與孝廉姚若麓每談心性之學如孟夫子盡心一語足以概之乃釋言明心道言煉心豈有二旨哉入門之途似分生死之理原一坡老亦取義于水江河分流回歸入海然則三教一教也孝廉恍然有得遂述水西數十里濶鎮之北有庵名三教者供奉儒釋

道三聖人自宋以來香火不絕孝廉謂三聖並奉則三教一理可知予詢主僧屬誰則曰向有高僧文淵與王大父方外交頗悉其人爲里中所推重相與友善如馬且區陸五臺袁了凡李臨川馮原泉賀道惺諸先生一時尊崇進朝賜紫出主禪刹刺史心涵包公及二三文學會請入庵焚修其徒真洎等恪守戒規克衍厥緒不但庵之所近士庶歸依卽郡城鄰邑有志修持者咸慕其風而向往焉世道人心維係非淺予聞而喜蓋喜其一室而奉三聖與余三教合一之旨愜也一日孝廉出菴古碑及府帖囑余爲之記予不敢辭自三教鼎峙在吾儒每持闢之說薄言仙釋若彼孰空

嗜元之士又奉佛祖老氏爲教主與吾儒角孰知佛教未入中國時有唐虞卽有禪之一言開般若門是堯舜卽活佛也尼聖一見老子稱之爲龍後世遂記孔子師老聃此三聖人總以心性之學提醒羣蒙源流未嘗不合如人生無大於生死二字儒言知生釋言無生道言長生夫知生則有無皆知矣儒言可死釋言了死道言不死夫可死則死亦不死矣以二氏棲心世外雖不及吾儒淑世明倫然能透會真旨則凡一切經史蹊徑皆融草化金身悟轉法華卽素王之功臣矣所可惜者人涵是心心俱可盡可明可煉而紛從言障莫悟宗風此千古無兩釋迦無兩道德猶之千古無

兩仲尼也若即心自盡能煉能明試觀娑婆極樂遨遊蓬島不儼  
然鳶飛魚躍景象哉有此庵而三聖人覲面可同心有此庵僧真  
洎等而三教合一之傳藉以不朽有此暢明古庵之孝廉而予叨  
任地方亦庶幾生色即謂予與孝廉同究心性之說一日千古可  
也是為記天啟二年歲次壬戌仲秋吉旦賜進士第文林郎知秀  
水縣事昆陵湯齊撰

鄉宦 李 樂 姚恩仁 施爾志 包世杰

孝廉 姚 遲 施有恒 朱大猷

明經 劉應兆 沈應箕 陳其德

文學 岳九敘 劉應期 錢 選 房應宿 劉應望

陸養正 沈廷楫 顧 問 曹桂芳 鍾應宮

翔雲觀碑記 瑣志 李 培 秀邑令

按柳志橋李有二幽湖昔陶朱公扁舟盤薄處也其一則今之濮  
鎮云鎮惟濮姓最著遂以名距郡城西南遙不滿一由旬水自天  
目分派從廟址入溪流四繞林木蒼鬱故湖得以幽稱邇來肆塵  
櫛比華厦鱗次機杼聲軋軋相聞日出錦帛千計遠方大賈攜橐  
羣至眾庶熙攘於焉集往亦嘉禾一巨鎮也東隅有元明觀俗傳  
創自五代悟法師數遭兵燹紀石湮沒無攷勝國初觀後壘奇石

爲巘峰高數丈層巖疊嶂宛若天造時峴紫衣鸞影飄然步虛卿  
雲翱翔其上如芝蓋會稽楊鐵崖題其榜曰翔雲勝境僞吳張士  
誠異之桴石以去所遺頑礫尙存元統乙亥里人不花濮也先鳩  
工建閣煥然改觀逮我皇明景泰時復葺讓議楊公青記其事尋  
以燬滅正德間煉師徐松溪徧朝名山邂逅異人受正乙符籙金  
簡玉字皆世所罕傳松溪髦不及演法其徒雲泉羅思齊少負奇  
志骨相殊絕受師元秘闔關靜煉召雷伐祟檄將斬妖魔不靈驗  
壬子夏旱赤野千里河渠龜坼郡伯唐巖劉侯延師登壇朱篆鐵  
券鞭龍溟渤甘澍應期而溢遠近或病或魔得師一喫水立效壽

八十猶赴四方之請臨化執其孫冲暘錢有德手訣曰汝能世我  
法有禱吾卽來助汝語畢跣趺而逝有德隨葬於三清閣之西麓  
從遺命也錢亦偉容雙眸黯暈炯炯望之知其非常羽流境內遇  
旱澇有司以禮請致登壇召將驅雷鞭霆一如其師以故輒禱輒  
應屢膺獎異適郡邑緝志有德不忍師名之泯沒狀其夙昔之行  
以聞二志俱得載師徒名先是辛巳方伯馮公孜爲恤刑時捐資  
重葺欲伐石豎碑以誌不朽未果及今復無記銘是非所以標名  
勝存高奇也有德奮然肩茲役以顛末示余聊爲敘次若此觀址  
舊額四十畝面水背石石廢首山門次龍虎殿次左右廡俱有神



像中元帝殿其後三清閣檀越濮也先住持鄒道寧朔左廡之東  
爲九天殿其後東西二院卽羽士棲真所并爲記之

令利津進士萬歷十九年任

重修元明觀記 瑣志節錄

岳駿聲 季有

郡城西南去三十里而遙有鎮曰濮院鎮東北市屬秀水界有觀  
曰元明觀有翔雲石天將雨輒有雲翔其上因復顏其額曰翔雲  
勝境云勝國時石爲張士誠昇之以去而榜額猶仍舊貫志靈異  
也觀始於元統乙亥間羽士鄒道寧潔志虔修募本鎮素封濮鑑  
所建厥後歲久傾圮而我曾大父松巖贈公捐資修葺山門殿閣  
煥然一新嘉靖中道士羅思齊修真得道時屬曠旱郡伯劉公令



禱雨甫三日而四境霑足卒成稔歲自是凡遇旱潦率皆依賴祈  
禱故世號十雨法師蓋言十禱而十應也事載郡志而士大夫亦  
各有贈言彙成卷帙後以其術傳其孫錢有德顯名萬歷間爲郡  
伯王公所重戊子大旱公令有德結壇其靈驗率如思齊有德歿  
而其孫王文正復傳其術文正黃冠而儒行倏然塵埃之外天啟  
癸亥夏秋之交旱魃爲災文正應召結壇指顧之頃靈雨滂沛乃  
獲有秋大抵天地間靈異之氣原不與物爲存亡故石雖爲張士  
誠昇去而靈氣未消鍾于其人遂使祖孫相繼一傳再傳至于道  
風仙範代不乏人是豈偶然之數歟是觀也余愚兄弟皆從童子

時負笈讀書其中而家司馬先中丞並弱冠脫穎以文章事業顯於世余即偃蹇不類亦獲幸叨一秩差肩其後則豈非靈氣有所旁及又若我曾大父於數十年前繕修一段機緣適為我曹厚植其基而累善陰功益以見元帝應感之不爽矣觀故有石碑燬於倭寇之難文正復磐石而乞記於余余以是為不可辭遂書其顛末如此賜進士第資政大夫原任通政使司通政使加二品服俸岳駿聲撰文崇正六年歲次癸酉二月朔本觀祈禳冠帶法官王文正立石

觀與福善寺同在至大己酉提舉公分宅所建若元統乙亥則又二十七年後司令公續建三清閣成紀歲於梁間者岳通政

因原碑之失而遂以是為觀始又稱鄒道寧募素封濮鑑建此均屬傳聞之誤誌畧

濮川誌略舊序 誌略

徐石麒 寶摩

余家武塘西南距郡城三十里又西南距濮院亦如之頻年遊宦攬勝多虛從父省吾故漢氏倩每述其魯國遺事繫懷仰止惜郡乘不具載泊移居構李嗣子柱臣又執經道水之門聞且益悉第因當時草昧之初避難流離濮川小誌散佚莫考即宋理宗朝以少宰之勲猷煨煨彪炳盡已失傳何況其他至成宏間匿姓遠逸者稍稍來復乃出其始祖雲翔公以下譜系所載八宅二十六莊并建置諸古蹟約略覩記裔孫草堂先生向珍篋笥未壽梨棗其

季君道水曰及身不述後將誰傳爰咨耆老搜碑銘徧考故典以誌之風土人文間附一二凡屬影響概付闕如道水負良史才殆以一斑自見乎昔蘇明允范希文輩咸追慕曩徽立法敦後迄今侈為盛事道水仿明允希文遺意彙輯成書垂諸金石使世之子孫曉然于源長本厚而無渙不萃勿使絕服以降遇若途人庶于尊祖敬宗思過半矣斯固其立言之旨也夫賜進士第柱國大夫太子太保吏部尚書前南京尚寶司卿吏部考功司郎中主大計徐石麟撰

濠廣文桐原傳 誌略

陳懿典 孟常

漢淮字大川世稱桐原先生嘉靖中人才名藉甚數奇困諸生以貢起家一再任延平僊遊學博非其好也天性孝友父病至嘗溲惡奉繼母自垂髫以迨耆耄色養如一日家有美田宅悉推讓其異母弟少受知於郡伯徐白泉公學使者徐文貞公仕閩與海忠介公交歡海每稱之蓋海亦閩廣文也時督閩學政者為宗方城姜鳳阿兩先生俱推轂學行第一會署大田縣篆僅五月吏民咸欲得公為真宰在仙遊日適倭大訖日夜與其令學畫城守事卒得無潰語載公碑記中謝請里居為鄉飲賓二十年晚喜讀易歿時笑語賦詩其於易深矣

秀水陳懿典萬歷己卯解元壬辰進士官編修晉少詹著有論孟贊義等書

濶鎮義塚碑記 紀聞

國朝張如戴 琅石

嘗讀周本紀西伯爲池沼見死人骨命瘞之天下聞之曰西伯澤及枯骨况於人乎觀明太祖嘗諭禮臣曰古之聖王有掩骼埋胔之令推恩及於朽骨近世俗薄或有親死而不葬者孝子慈孫亦復何忍其禁止之若貧無葬地者有司擇地爲義塚俾之葬埋然則邑有義塚固盛德事亦周官遺法也歲乙酉余莅桐鄉公餘採詢風俗大都士惇農朴商慤女憧家詩書而戶禮樂雅稱善俗邑之東北隅爲濶院鎮去鎮里許有義田一十一畝有奇則鎮民陳國紀沈世珍等掩骼地也余義其事而問其田并召致其人其貌

醇謹而行端朴殆古高隱者流歟明萬歷己酉聞孝廉朱大猷創爲斯舉洎崇正庚辛飢疫頻仍殍骸充路國紀等惻然傷之偕孝廉從子朱茂耀踵武增修與里中諸同志益募置塚田計兩載所埋不啻五千云於是董之者二僧岍然韻若相繼不憚胝胼亦有足多者余耳之歎賞不置以爲此義舉也仁風也用申諸憲在作公占永免差糧以旌其義豈市惠哉成衆志焉耳昔子瞻莅惠州爲文以祭枯骨詞義藹惻迄今讀之心動余蜀人也謂擬子瞻子則何敢特因張子和鍾子貞之請爲敘以誌一時盛事且以廣後世仁人君子之心於不朽焉桐鄉縣知縣閩中張如戴撰

張邑侯四川閬中人舉人順治乙酉任縣志云立祠城隍廟左

永安祠記

程鵬程桐溪紀略

漢龍錫九上

祠何昉乎昉於祖先之鎮火庵也讀文敏趙公銘明之公碑誌元大德中建於舊宅之朱雀坊與東嶽祠並著焉祠之名庵為祠者何代乎讀漢川前誌明成化中祖諱松者即庵而鼎新之設宋元明三朝雲翔公以下木主凡子孫有嫁娶事奉牲以告焉祠之幾廢而復興者何時乎閱復祠公案崇正丁丑有假鎮火為嫌欲圖鳩處者道水公偕我族人力籲當道郡侯鄭公瑄桐邑侯盧公國柱奉直指喬公可聘檄得仍世守無廢祀焉其基址廣狹四訖有

籍其輸稅版戶有帖其間架規制有圖有志宗子董飭理緇徒司啟開此祠之所由來燦著也然永安之義何居我祖先之意非曰使我後世子孫藉此以邀福祉歲時告虔僅安先靈而已也是欲一姓安而比閭族黨皆安處常安而兵戈水火無不安我祖先有行之者矣如簡鄉勇以禦突豕而危者安傾儲橐以活哀鴻而飢者安辨磽瘠以減土賦而耕者安慮洪荒之不安於瀾也濬流築隄以捍之慮行賈之不安于市也織綺列肆以通之慮妖厲之不安於魄也設壇啟坎以藏之至安童蒙則有義塾安緇流則有院刹安死葬則有楷櫨明之以下樂善不倦世有令德貽安於比閭

族黨子孫亦得以緜遠滋大無相傾側者實有見之行事風示來茲其命名之意至深遠也傳曰有大功於民則祀之能捍大患則祀之記曰過墓則哀入廟思敬不獨後昆拜瞻奮興紹衣令緒於勿衰卽比閭族黨附枝藉蔭當比之甘棠勿剪勿伐祠之藉以永安者寧獨一姓而已哉第自丁丑迄今又四十餘稔雖廟貌不改得毋有實逼處此者乎得毋有風雨漂搖乎得毋有鞠爲蔓草乎以時修舉是在宗支惟力是視余恐歷年久遠漸忘其始基創修之繇來并沒其垂庥命名之深意故臚其大略而著之編使後人思其義而毋致廢墜焉蓋竊有深望矣

濮龍錫秀水諸生住郡城

鎮圖說 誌略

濮龍錫

古嘉禾志崇德州志暨明郡邑新舊諸志無不娓娓稱濮院一鎮濮氏盛事有足多焉然或彼詳此略或前載後遺莫能執一以悉之卽訪之故老詳述曩勝恐掇拾風影貽議來茲慮非核見參聞著圖傳信後有作者其徒憑諸游談剩址以相詡哉惜濮川小志一書無從破壁鑿梁再獲全覽惟別駕周冲宇濮溪志草什存二三合訂位置與巷語所垂罔不符券宋沒未備明初漸湮撫景追尋時在皇慶延祐間蓋提舉節推元帥司令諸公正頡頏斯際乎過此而降兵燹流離卽俗所傳八宅二十六莊在周氏志草中已

云無從考竅何敢附會滋疑但南新一街白衣永正二梵舍雖爲後建亦屬崢嶸故皆踰格附入若我族而外大姓繼著者四曰劉貝燕朱而馮岳楊施後先濟美堪輿氏以爲水來長谷正屬巽方土脈旣厚聚氣復深故秀毓人文代興節義機杼之利日生萬金而大姓卜居歷享富盛蓋非無由

濮川誌略序

桐溪紀略

顏鼎受

余爲童子時長老多稱濮氏族甲由拳蓋自吾邑分治之先而濮已寢昌其所從來遠矣歷有宋暨元明以迄於

今國家邑有開鎮之祖郡有半城之名祠祀春秋指以萬計譜籍誌

載代有聞人嗚呼何其盛也憶自丁亥歲於郡文學道水先生家見所載濮氏遺編歎其傳世多積累茲復得與九上交挹其風軌則至德可師有是哉賢達之後果與衆殊也世徒知簪組之爲榮門閥之爲顯耳乃德義弗聞雖多又何述焉甲辰冬九上示余此編因感幼時所聞與今日所見合識之以爲序

顏鼎受字孝嘉諸生少負異質通十三經九歲能詩著有誦詩弋獲等書載郡邑志

張節婦傳 紀略

施于海

明天啟間吾里有張節婦者姓濮氏年二十歸於張踰年而其夫死夫之兄曰張某者以其年少而寡且無子疑其有異志也勸之

嫁不可復令氏父母勸之仍不可已而復與氏之父母謀私許嫁於郡城富家富家以舟逆之備鼓樂乘車燈綵於舟中而其父給女以往探親戚冀其登舟而成厥謀也氏疑之語父曰吾歸張不幸孀居父母之家且不宜返奚有親戚爲父屢趣之卒弗許日夜號泣欲自殺父恐謀遂寢富家之舟留三日而去其後哭泣弗已不踰年而死宗族咸高其義歲時祭祀至今弗絕焉  
施于海曰子母氏張因傳張節婦堅拒逼嫁一事抑亦曾子所云臨大節而不可奪者乎天啟時魏奄當國士大夫多偷行草野巾幘中乃有此介介也夫節義出於天性何代蔑有特不得有力者

爲之上聞邦國著名後世悲夫

重修福善寺大殿碑記

秀邑志  
節錄

仲宏道

開一

濮川古構李之墟吳越邊鄙爲嘉秀桐三邑之錯壤爲南北商賈都會之地而無名山大川洿池邱壑之娛其形勝所峙巍然甲於鎮中爲一方擁衛者惟福善寺寺昉于元有寧遠將軍濮鑑者獨力捐建因其初有崇福積善二庵遂額之爲福善云元末燬于兵明永樂成化時有僧前後募修得闢今址里人遼府長史楊述紀之詳矣第蜂臺未擴檀林狹如所以善智識之塵談久寂大比邱之棒喝無聞也邇年來卽有領袖開堂者俱不久以故去



今上卽位之十一年歲壬子衆乃請鶴峰和尚主院鶴師爲雙徑高足三峰嫡裔宗律湛深温恭朴謹乙卯丙辰間因南服未靖年數不登師此時香積無烟祇園斷火清苦自甘進修益力于是感動檀那悅服者衆三樓之未竣者至此咸竣亦可謂蜂臺改觀檀林遂穆矣歲戊午師念正殿自先年雷震壞後漸至頽圯門垣柱礎又從火滅之餘尙無整理乃矢願重修又憂工料浩繁未能成就對衆自誓曰我如不成此工者有如此殿于是鎮中之綱行接領輩各許每綱一疋捐資一釐暨善男子善女人所施者積銀若干兩鳩工庀材師躬親劬苦不敢告勞至己未歲大殿軒廊葺舊增新

西兩廂樓房以及伽藍祖師殿漸次皆就周圍繞砌固以石柱榑檻綺疏蔚然可觀其餘厨漏松寮亦咸備具盡心殫力夙夜經營皆出自若水一人之手而未嘗借緣於世豈非振興之豪傑哉然則閣之毀與殿之灾佛將啟若水而更新之以顯其法力也今又謀構正殿及山門棟梁榱桷次第備集而若水之精一純密雖老不衰將落成之後不與創建者同於無量乎嗟夫余旣年髦閱歷亦久未有如若水之誠心勇猛精進無已者也因樂爲之記以告後之克續其緒者云

師姓潘諱圓泉字若水秀水縣人

銘曰佛法不生滅寺云何福壽法法自相生爲善天所厚天厚錫之福天厚錫之壽福壽所由來修持貴堅久試觀此殿閣莊嚴堪不朽創建固艱難功尤藉法守願發菩提心願捍金剛手以此修持心共臻福與壽

時

康熙四十四年歲次乙酉春三月穀旦山東嶧縣舊尹八十四叟里人仲宏道開一氏頓首譔

延年井亭記

瑣志

顧高嘉

南樓

福善寺創於元歷有明而盛於我

朝約四百年矣代有高僧駐錫接四方衆常與數百人俱而近庖乏井飲水必取給於外河此亦有寺以來之缺典僧明修年近六旬職運水以供衆於熱暑更艱一日修忽出八金爲營井費以補從前所未備夫一行僧耳始以其力運水繼以其資鑿井亦可謂有功於寺者矣是年亢旱余偕老友十餘人禱雨寺中聞其事而嘉之第不爲紀其始末恐後人陰受其利而不知誰爲之創因各捐杖頭構亭於其上俾後之憩息於斯者得以知井之所自來且顏之曰延年井以下斯井之可以垂不朽時康熙四十六年歲次丁亥仲冬月中浣吉日

捐資姓氏

李徵素	賈允升	蘇慎卿	陳鑒民	程仲光	葉英夫
高震寰	濮瑞源	李含白	曹恭簡	項丹崖	吳西來
楊自修	張嗣馨	周位雲	葉駕青	朱玉亭	孫爾宜
黃二萼	蔣勝賓	潘伯陞	居洪濤	于君昇	張秀林
葉介繁	劉文輔	盧天石	施茂卿		
濮氏族譜序	<small>家乘</small>			杜	臻 <small>肇餘</small>

族之有譜紀欲其詳無取其蔓序欲其簡無取其漏然非代有聞人作述相繼曷可易言以是知祖功宗德端亦藉於孝子賢孫而

傳且彰乎吾鄉多巨族濮氏其一也系出顓頊得姓以百濮後之以濮名州名院名水者皆其子姓聚處得名而濮院為最著其子姓較他處亦尤盛余里居時往來其地見夫人烟之稠密里居之湊集而賈者廛相連販者擔相錯讀者聲相聞耕者影相接未嘗不歎其繁且衍蓋卽有他姓雜處而濮氏實為開鎮之始四十年來余以官京師不獲時經其地然憶及之猶恍在目也已卯冬宗人駕凡以重修族譜告成攜來都下請序於余復備閱其源流詳考其興廢如文學仲祥武功忠襄又不僅光於家乘且炳於史冊者也其大啟後人而緜延弗替不亦宜乎至夫詳而不蔓簡而不

漏則族譜之所同也康熙己卯仲冬其年至夫時而不變而

賜進士第光祿大夫 經筵講官兵部尚書加二級杜臻拜書

濮氏家乘序

許汝霖 時庵

大凡姓氏之著其來也遠故於上世多荒渺而難稽又以族大散處遷徙無常則不可考譜系之所關詎不偉歟古吳有濮院濮氏巨族也其始祖雲翔公扈駕南渡由曲阜而卜居茲土一時簪纓纍纍三吳氏族無有出其右者厥後理 賜院而名益著迄今五六百年來子孫聚處繁衍滋茂所從來遠矣裔孫駕凡嘗遊京邸

樂道先人之事一日出其家乘乞余一言以冠其首余觀其支分派別源委詳明且先世事功勲業及名賢哲彥詠歌題贈以導揚其盛者靡不一一備載分門別類使觀者秩秩可考將見緜緜瓜瓞識所自來必思有以振興而克紹之則其厚自刻勵而於族誼亦庶幾日加親親而敦崇焉則其功豈淺鮮哉余是以樂為之書賜進士出身翰林院侍講學士許汝霖題

濮川詩鈔序 桐溪紀略

陸奎勳 聚穉

從來地以人重朝川之以王浣花之以杜類皆文采風流炳灼千葉濮川何獨不然濮川向名梧桐鄉為宋吏部侍郎濮斗南賜第

楊鐵崖宋潛溪後先有記名昭志乘自宋元來代多述作明季沈海鷗先生與孝子濮澹軒前輩以詩倡率里中人翕然從風入國朝號稱極盛海內月旦之評謂其詩得正宗焉顧詩之散見于選刻者甚少既無手輯專集或集雖成而未及開雕幾幾乎零落無存噫後人不幸僅以詩傳又不幸而無以永厥傳此其亟爲表章者責不在乎後人歟梅涇沈君山臞海鷗之從子也幼工詩克世家學而欲發潛德幽光因偕謹堂陳君檢得前輩遺稿及同社之能詩者數十家繡梓題曰濮川詩鈔蔚成鉅觀矣我郡濱湖負海人文輩出蔣翹之樵李詩乘雖什伯朱翰英華要不若南疑詩

繫搜羅廣博南疑歿後予復爲之鈔補缺漏付之剞劂己丑距今閱三紀詩老遊道山又指不勝屈行將事續編之選禾中若鹿干新編南池詩鈔同會倡和我邑若東湖洛如兩社詩集均可引爲將伯之助今喜誦濮川詩鈔不亦大慰予懷也耶山臞于鐫成日寄詩索余序有云及今不收拾是則誰之咎又云吳地無風詩願附詩繫後予是以不能默而息也衰年多病筆禿少文不敢虛沈陳兩君之請用題數語以歸之時乾隆庚申當湖易窩老人陸奎勲書于寶齋

陸奎勲字聚緝號星坡康熙辛丑進士官翰林院檢討著有陸堂易學詩學今文尙書說春秋義存戴記緒言等書

辭董縣尊書

府志

陳梓古銘

布衣梓草茅迂鄙懵無知識不謂濫蒙非分之譽致學使者齒及寒微賢父臺折簡下招兼委學師枉騎見邀梓何人斯而敢當此且適嬰末疾就醫鴛水密邇臺下徒以不勝拜跪未遑趨謁悚愧交并無地自容矣竊思宏博一科乃

朝廷鉅典非名宿偉儒無由應選豈宜以荒疏病廢之人充員備數梓自髫齡失怙頽惰曠學雖有伯兄督課雅不率教弱冠應試入股粗劣自揣荒落無路上達遂棄帖括以蒙為恒業暇亦有意學為詩古文詞抒寫性靈而家貧無資購書借閱交戚間又苦質鈍

過目輒忘以是鹿鹿無一成中間先慈先兄相繼謝世兩猶子二兒俱以痘殤後嗣懸絕悲憂泣涕遂成忡悸十年不瘳又少患腳氣間歲輒發發卽數月不下牀榻年纔望六鬚髮遂以皓白近復增風癩疾竟日爬搔夜臥呻吟目罕交睫膿血濡染衣被為兒童所憎惡者又六年於茲矣以疲癯之軀一旦強之使偃僂束帶於王公大人之前必至謬亂失儀滋益罪戾人苦不知足幸生

聖世得保殘喘與桑麻鷄犬為伍含哺鼓腹扶杖而觀

德化之成私願大愜矣尚敢冒薦賢之盛舉希分外之殊寵以自欺而誑世思覲顏竊祿于

化日光天之下哉梓竊聞士之品有三首道德次經濟次詞章梓自省  
彝倫日用動輒得咎卽一知半解亦無當於道之大原立言且不  
能於德何有區區數口生產不給卽教授童稚於小學規模尙不  
克井井就理於經濟何有孤陋不足備

顧問才識不足參史館無論其他卽今試士題門下或舉以見質不能  
出一語相副於辭章何有萬一謬膺甄拔

聖天子臨軒垂詢將目瞪口瘖韜管束墨惴惴焉曳白而出縱愚賤不  
知耻得毋大累於當事知人則哲哉此所返覆籌慮而不得不  
直陳於執事者也寒素需館爲生卽日抱病渡江爲此瀝布悃忱

惟賢侯俯鑒下情婉辭學使俾邨野農疇不致冒竊獲譴將敗茵  
朽株亦得嬉嬉雨露以全其生於材不材之間悒悒之庇戴澤靡  
旣矣

楊氏家譜序

朱珪

族譜之作匪第次年世紀名字而已必有勸懲之意存乎其間蓋  
萃一族之人數十百年之遠其間富貴貧賤賢不肖紛然雜出而  
皆以合之於譜使一姓之人富賤其貧貴厲其賤賢化其不肖烏  
庶孝弟之心可以油然而矣桐鄉楊君澐余督學兩浙時取貢成均  
士也少負盛名雅不欲文藝自鳴惟以植人品敦根本爲先務歲

辛酉公車北來出其續修家譜問序於余嘗攷子雲自序譜牒稱  
 先世周伯僑食采於晉之楊為楊氏班固傳从手為楊用修論姓  
 氏載晉羊舌氏伯石食邑於楊曰楊食我後分其田為縣曰楊氏  
 則楊氏之所繇來者遠矣君先世自江右來明初徙居濮院世有  
 令人蔚為望族是清門之最久者今觀其支分派別序次井然近  
 者不疎遠者不紊於合族之中不失勸懲之意美哉彬彬方眉山  
 蘇氏遺規何多讓焉彼世之擅文章誇聲譽紆青拖紫而於本支  
 同氣疇之如塗人焉聞楊君之風其亦可以少媿矣

嘉慶六年歲在重光作噩病月大興朱珪拜序

沈母李孺人傳

成仁集

馮

浩 孟亭

事有出尋常理數之外俗士駭之迂儒疑之實則血誠所激發從  
 萬難挽救中決此一往靡他之計通神明奪造化人定而天不違  
 其究歸於藝倫之篤行似奇而至正是以其志克遂也如沈母李  
 孺人者可傳已李與沈皆桐鄉舊族世居濮市里孺人父廷文早  
 卒依其母宋居外家年十九適沈君昌宏時母已卒沈係姨母子  
 外王母命之于歸乾隆十九年歲次甲戌之九月也姑亦已卒偕  
 夫事舅修潔白之養孝敬無少懈時家業中落操持儉勤日有滋  
 益生子朝棟朝楨庚辰夏夫積疾增劇醫禱罔效念上有衰白舅



下二孩提子夫若死身亦義當死卽不死仰事俯育安能如夫存之胥善祖宗遺緒懼自此墮廢計莫若顛天身代以延夫子命早夜焚香泣禱孟秋朔旦告於舅曰婦薄弱不足上感請翁繕疏爲助庶有濟翁弗忍固請乃從之孺人急奉疏詣東嶽廟神案手焚哭禱歸事夫病彌謹至五日欣然告翁曰有二鬼來告神許婦代夫病卽瘳矣翁未深信又曰翁當見信且急迎陸氏姑來欲與之訣諄諄以舅及二子托語畢逝矣昌宏病瘳閱十二年乃終朝棟兄弟成立行誼淳謹舊業遞豐訓子姪力學里鄙交推之嗚呼迴辱魂於瀕死振家業於將傾苦志堅定操券可必一死之力實全

家再造之奇功豈非巾幗英賢閨闈獨行沈氏子孫當世世不忘者哉余同年李峩村太守孺人從兄也朝棟賈其手書并諸君詩文來請爲之傳理不可辭遂筆之以俟志乘采錄焉

論曰幼讀春秋左氏傳晉范文子魯叔孫昭子俱使祝宗祈死而卒竊異之曰死其可祈耶古之宗祝術信神耶當雍正壬子歲先祖考總上江藩於江寧疫大甚先妣孔太恭人病危婢桐花仰天曰主母不可死婢願以身代天乎活我主母次日桐花死先妣昏沉中若有大震驚者汗浹而神甦漸愈乃信鬼神之爲德不可測也惟至誠可格也今觀沈母李之事蹟尤足重綱常助義烈天鑒

俯從其亦佑民之顯道哉

楊蔭穀先生傳略

馮浩

君諱紹基字崑田號蔭穀姓楊氏浙江嘉興府桐鄉縣人系出後漢宏農大尉後世遠莫詳君十一世祖君顯由嘉興遷桐之濮院鎮遞衍遞繁有遼府長史述河南僉憲青父子聯芳崇祀鄉賢自是代多文士蔚爲望族祖考可庵公諱權鄉飲大賓子三長省園公諱燈次稼軒五快亭君省園公長子也母阮氏生母湯氏省園弟稼軒早卒君仲弟次槐繼之與季弟愷六皆同居怡怡極天倫之樂君穎敏能文成童入泮學使彭芝庭先生深期賞方騰聲庠

序顧以親老弟少身當總家政援例充貢生詩書夙好終老不捨孝友根於天性承歡養志愛敬無幾微懈遭喪哀禮備盡延地師擇吉壤用安窀穸皆出一人心力季弟早亡撫卹孤穉肄業擇配未婚而夭弟婦王氏冰霜苦節歿同安葬且請

褒旌

次槐卒無子商之弟婦曹氏得快亭次孫繼昔所分授產君爲兼理者出付之視舊帳加贏君心神淡泊風度整肅崇質樸屏華侈衣食不求豐美待人有真意畜疑商權者準情理孰等不參一私友戚子弟動必禮法規勸故每有始畏其剛方終感其正直者君雖習計然策總挈大綱不斤斤細校嘗訓子步蟾曰儉勤守此足

給日用學古謹身世傳素業幸矣不吝施與庚寅乙巳歲旱災告  
稜率先輸貲賑濟 當事給扁優獎橋梁道路祠廟有役必伙助  
無倦色周濟貧乏輯族譜營藏域丙舍公私事備經理焉加捐候  
遷州同知例

授儒林

郎體素壯今年孟秋忽嘔血才一晝夜遽逝勞心積久故爾距  
生於雍正壬子年六十有七配鍾氏側室及氏子一步蟾孫四光  
祚文祥維祺景福文祥為愷六嗣孫君之子乞為之傳爰撮其略  
云

論曰里仁為美以多善人相薰育也濮院古未有名與於宋盛於

元以迄於今俊秀重經術喬野習機杼風尚淳謹少囂詐剛暴科  
第簪纓蟬聯不乏楊氏遷居已四百餘載是清門最久者余先世  
自湖州來居濮湖之亦當在厥初桑梓之誼雖再遷猶切焉如楊  
君耆砥行持家範於士型於鄉後輩則而效之俗不漓而業日光  
矣其可傳也哉

賜進士出身

誥封中憲大夫鴻臚寺卿前掌山東道監察御史

敕授儒林郎翰林院編修加一級年家眷弟馮浩拜撰

題濮川十二景圖

濮啟元 玉巖

明學士宋景濂題咏澗川八景所繪圖畫出於仇君十洲之手妙絕一時從子蓉初篤志好古遇董生灌華自稱半間人囑仿仇筆摹繪八景外益以四景曰雪筠齋桐香室松月寮讀書臺其餘濮氏林泉遺跡掛漏尚多今成十二幅亦可備搜羅之一助也至古今名公鉅儒題贈著作自雪廬子楊廉夫以來略記什一於後乾隆甲寅春玉巖題於汲修書屋

沈白山景孫樓帖記

吳奕傳紹虞

景孫樓四十種帖沈白山摹古本也白山名朗字仲韜為海鷗先生從姪始海鷗授以八法後娶於郡城王氏其太翁子逸公以書

名勝國外翁子用公出家藏真蹟以示既徐士白過吾里同俞揆千莊廷占岳泗庵輩共相砥礪白山書大進由是簡練揣摩由二王參以唐宋元明諸大家此册自漢蔡邕書郭有道碑迄明董華亭跋眾香堂帖後凡四十種或節或全俱神似而非形似後有仲改庵歸青書兩跋子向於友人沈子端音處屢觀焉茲又借觀旬日而歸之乾隆乙巳八月二十四日記

濮珊園先生傳

楊澐湘帆

公諱懷珍字繡中號珊園姓濮氏太學生宋駙馬都尉雲翔公二十六世孫也會祖東瀛公諱元孝由歲貢生任海寧訓導歷官沙

河平鄉知縣祖恬坡公諱枚太學生嗣父奕芳公諱應恒配曹氏  
本生父魯峰公諱應泰太學生娶楊氏生一子名德瑛繼娶沈氏  
實生公幼聰穎塾師以遠到期之體素羸弱遂棄舉子業性至孝  
能以色養父母歿哀毀骨立與兄經理喪葬咸盡禮事叔仙壺公  
甚敬伯仲間終身友愛內外無間言宗黨姻戚中有艱於婚嫁者  
必勉力扶助族叔母胡早寡無子矢志守節公與族人饋薪水費  
無虛月生平甘淡泊戒奢靡與朋友交然諾不苟居家無疾言遽  
色訓子姓悉本儒先格言鍾君振民一鄉稱善士命其子師事之  
曰俾兒輩薰其德也府邑志載濮氏八宅始於南宋公之先自梧

桐橋西舊宅遷永樂市之南公復移居大牆宅栽松種菊翛然塵  
壒之外好法書名畫不惜厚價購得之摩挲終日不倦友人以書  
畫相質辨真偽不爽苗髮石門方蘭坻先生與公契合過梅涇下  
榻草堂中論詩讀書相視莫逆爲公繪松陰晏坐小像諸名士題  
咏甚多公生於乾隆丁卯正月初五日卯時卒於嘉慶癸亥八月  
十三日未時年五十有七配邱氏生三子長承鈐次承鈐俱殤三  
承鈞女二繼室王氏生一子名承鋤女一孫希洛余先世居嘉興  
自平山公遷幽湖與濮氏世爲婚媾知公最稔公之子乞爲之傳  
爰撮其崖略云

自平山入... 和善多公... 十三日... 草堂... 濮川所聞記

濮川所聞記卷五

胡珠船先生

張文韓先生原本

楊蔭軒先生

金 淮曉瀾 濮承鈞政衡

濮 鑽離宣 岳洙傳魯源 述

詩

語兒新月

唐徐凝

幾處天邊看新月經過草市憶西施涓涓水宿初三夜曾伴愁娥到語兒

古戰場

宋張堯同

自昔干戈地城空草自荒漁樵懷舊事何敢議興亡

梧桐涇

落落梧桐樹何年作鳳鳴試看千古翠流盡一溪聲

次韻濮太守賞梅

王十朋龜齡

春向羣芳頭上來可人風味亦奇哉未於茅舍疎籬見先爲金枝  
玉葉開竹外橫斜纔數點笛中搖落已千堆因公撩我惜花意深  
憶去年湖上杯

次韻濮太守詠知宗牡丹七絕

錄二首

地近堯天饒雨露花王窈窕多風度書生不辦買花錢空解搖毫

爲花賦 香苞初坼曉霞凝甲第名園冠紹興玉葉金枝老詩伯  
更將好語爲褒稱

幽湖遺跡

元吳萊 立夫

淡淡寒雲鶴影邊荒阡故宅忽千年大夫已賜平吳劍西子還隨  
去越船白石撐空留罔象青松落井化蜿蜒獨嫌此地無章甫只  
解區區學計然

一作成廷珪 題范蠡宅 以上紀聞

弔濮氏化壇有感

鮮于樞 伯機

燐火沾衣拂復來濮家掩骼聚成垓於今海內撻鋒刃誰念遊魂  
泣草萊

漢元帥北征還贈元帥各銑

釋克新仲銘

海國元戎鬢未斑歸來拄笏看青山田園暮景烟塵外臺榭春風錦繡間桐影連溪鷗夢穩桂香吹月鶴笙還碧尊綠鱸黃花酒時向尊前一解顏以上邑志

白題桐香室

濮允中樂閒

研經暇卽課子掃榻倦亦留賓莫嘆秋風蕭颯穿林片月如銀府志

百畝園種蔬

濮彥仁仲温

小築茅廬一徑開雲林深處少塵埃家園百畝躬耕罷五柳門前次第栽

梅涇卽事

涇居風味倍蕭森常有流鶯送好音一夜雨餘梅子熟小庭香滿伴清吟以上邑志

蛇蟠石歌爲濮樂閒司令作

黃玠伯成

吾聞萬物之精上浮爲列星天星之精墮地或爲石此石似蛇蟠其故要非人所測我疑芒碭赤帝子拔劍斫地白蛇死老嫗夜哭天不聞羣小連蜷化爲此又疑愚公移山時此物欲與山俱飛蒼黃不及蛻皮骨操蛇之神手脫遺年多物變形質在豈有毒心猶未改晚之非蚘亦非巴雪色真類蘄州花徂徠小松葉如髮一龍



五蛇相紐結咫尺常疑雷雨來尋常頗耐冰霜冽醉李主人初得之舉杯彈琴詠新詩便能雅拜亦不俗未可遂笑元章癡

題濮仲温松月寮

陳約 博文

溯源傳玉葉世外想高蹤道似山中豹人猶柱下龍後凋殊不改孤照若為容只此披襟坐塵囂隔萬重

贈濮元戎尚師

梁寅 孟敬

回首英雄即是仙孤標直跨子房先毓精鉅野麟生處感歎華亭鶴杳年驚坐頗存遊俠氣忘機不是愛空禪遼陽被毒經三載亟起東山試逸鞭 以上府志

訪鮑仲孚先生西溪隱居

周致堯

溪上齋居好幽偏事不侵桑麻存晚計圖史樂初心岸幘幽窻曉移牀綠樹陰卜鄰何待老從此數相尋

濮川八景

明宋濂 潛溪

太古烟霞錯繡楹拍天蒼翠纈虛明擘開千佛無文印不似空題雁塔名 福善翠洽

凌虛不用跨青牛拄杖為龍任去留極目山川知己在乾坤冷落片雲浮 翔雲高眺

曉雲一帶舞衣輕脫體風流最惜卿莫道故人心不見半簾春色

露傾城 妝樓旭照

踏穿清淺水雲奔  
皜日當空雪滿村  
可笑羅浮山上客  
一枝明月醉黃昏 梅溼花午

潑翻鷗鳥夢  
驚飛細捲波  
痕滴翠衣  
落日半竿花未睡  
采蓮人逐釣船歸 荷塘晚風

霜花零落暮秋寒  
一醉西風樹葉丹  
却怪楓人留不住  
滿溪月色老夫看 化壇楓冷

蒼旻不掛一帆絲  
兩岸漁歌月上遲  
看破嬋娟全面目  
菱花無語笑馮夷 幽湖月滿

夕陽倒插暮雲沉  
醉翦臙脂結翠林  
絕壁丹書人不識  
柴門深峭聽歸禽 西院纏霞

按八詩有兩本七首韻全末一首并韻亦異附錄于後 考宋學士本集並無之

春深老桂藹前楹  
寶閣琉璃照日明  
一代豪華誰復在  
梁間惟有舊題名

幾度憑闌問斗牛  
丹霞天半白雲留  
參差村樹隨溪轉

閃出青山塢影浮  
重完百越一身輕  
飄泊滄江伴范卿  
睡起日

高頻拂鏡重添眉  
黛覆何城曲溪古  
岸淺流奔千樹  
梅花作一

村畫靜香陰踏不盡  
何須疎影月黃昏  
林塘日暮彩鴛飛  
涼動

汀菰香滿衣浴罷  
蘭膏一載酒彈箏  
高唱采蓮歸  
一夜西風佔

早寒輕霜染就樹頭丹獨悲烽火年年碧誰到蕭疎尚忍看 畫  
船吹竹復彈絲一鏡疎林欲起遲若是此湖真色相當年安得隱  
鷗夷 碧瓦蒼松麗野晴雲光散錦繞檐楹梵聲斷處絕無語但  
有歸啼一暮鶯 紀聞 按海鹽王惟梅嘉府典故纂要云文憲有濮川八景詩張文憲  
字廷鑑嘉靖癸未進士官至工部尚書及卒詔刻文山文集

按濮川紀略後八首浦江宋景濂先生作前八首辛丑仲春釋  
行彌過梅涇而作府志云行彌字芥子住錫梅里眉庵清修梵  
行工行楷書能詩著有語錄若干卷 此詩小序有云宋學士所作三百餘  
年矣弔古訪今聊寄一時之感云

濮川月夜清遊歌

江漢朝宗

有客來叩門邀我清夜遊夜長苦無寐夜遊慰淹留於是仲冬十

五夜小星嘒嘒奎與婁乾坤上下絕塵滓團圓月色如中秋恰如  
星盤出東海照我毛髮寒颼颼此時清興發與客相綢繆卽從西  
街入便至西河頭行行渡溪曲石梁跨清流魚鱗萬屋似城市市  
廛行盡皆田疇我行興未已客指歸路休歸去語妻子此時足清  
幽不知百齡內夜夜得此不生平不作不平事遊時不覺心優游  
客如有期我不爽相攜再作明朝謀 邑志

題破窻風雨圖

若有人兮青雲衣珮玉玦兮光陸離爰處兮爰居左琴劍兮右圖  
書輕富貴兮浮雲保厥美兮天真山房兮寥落天真冥兮雲漠漠

雨蕭蕭兮風夜作心耿耿兮不寐紛遑遑兮求索薄彼夫兮貪婪  
惟聲色兮是耽文繡兮膏粱蓀何爲兮懷慚秋蘭兮可紉吾所思  
兮古人寒檠兮雪案甘與君兮相親 紀聞

過桐梧涇時官籍濮彥仁宅妾龐氏唐氏自經感而賦之

貝瓊廷珺

天寒水清石齒齒杏葉初黃荳花紫舞榭歌臺不見人頭白鳥飛  
月明裏當時豪俠輕王侯一榮一枯八十秋綠珠已解死金谷草  
露作淚無停流 邑志

寄糜孝子

幽湖老人七十餘一身如蝨隱圖書朝廷不起常夷甫鄉黨已知  
徐仲車海燕定巢來屋裏林鳥得食上階除雨晴有興卽相過一  
葉小舟通竹渠 紀聞

寄幽湖客舍

我無太古明星宅白首西東寄此身已免崎嶇投劍外敢辭寂寞  
老江濱枇杷結子初肥雨芍藥留花不見春萬古乾坤同逆旅兩  
山風月屬詩人 府志

九月望日僧覺原過幽湖讀書所走筆爲贈且有紫薇山之

約

野老讀書溪水南  
渾如杜甫百花潭  
安得仙人來七七  
且從禪客語三三  
山多秋雨都荒菊  
樹著新霜未熟柑  
更約葛翁丹井上好  
詩連夜為君談

府志

送朱顯道赴濠上

將軍五月過盱眙  
雪浪樓船快馬馳  
天地重開新造國  
山川多紀壯遊詩  
千屯霧合耕耘處  
萬里星奔貢賦時  
却向秋風候旌旆  
南還莫負雁前期

紀聞

桐鄉夜織

朱逢吉

以貞

桑柘綠陰肥  
千村翳夕霏  
機聲交軋軋  
燈火競輝輝  
賈客留金去

兒郎出市歸  
喜輸官賦足  
誰復歎無衣

泊舟幽湖

方孝孺

正學

十載飄零一夢中  
桃花依舊豔東風  
濮家舊院今何在  
到處機杼

一作說女紅 邑志

入濮院路

項忠

蓋臣

行盡禦兒涇  
纔過語兒亭  
將軍鉦鼓靜  
母子笑談寧  
破國霜千樹  
還家月一庭  
明朝載酒出  
鷗鷺滿沙汀

府志

臙脂滙

蘇平

雪溪

西子曾經此地過  
調脂弄粉鬪雙蛾  
乍辭越國山  
應遠望入吳門

路不多春滿玉容初罷鏡香生羅襪欲凌波古來尤物能亡國鹿  
走蘇門奈爾何 邑志

洞溪 府志云卽濮川所  
通處一名梧桐涇

李蕃 文盛

萬年禹鑿東連海百折清流曲抱村風浪不驚魚鳥靜桐花開到  
邑侯門 邑志

吳越戰場

潘蕃 廷芳

吳越興亡宛目前游屯涇上草芊芊夕陽滿地生寒色野燒浮溪  
斷暮烟麋鹿歌臺今往矣鷓鴣舞殿亦淒然祇餘賜劍當年恨惆  
悵東風哭杜鵑 紀聞

濮節婦

高岳 彥高

蚤年事夫君碧梧對舞雙青鸞夫亡失所天朱絃旣斷不復彈孤  
燈夜雨愁漫漫眼中流血何時乾將心擬古井信不起波瀾將心  
慕貞松願歷冰霜寒子猶未成立甘旨奉姑良獨難只今已老凋  
朱顏秋風兩鬢何斑斑此心終不改此節誠難攀璽書忽從天上  
來旌表特起青雲間青雲間世稀有柏舟詩旣成共姜之名垂不  
朽 邑志

濮門劉節婦

潘葵

結髮事良人恩情與海深誓堅百年志以保九泉心白玉鳴遺佩

黃金暗古簪梧桐原上月奕世載芳陰

紀聞

題馮母張貞節

王家屏 對南

霜月淒涼寶瑟寒宵燈滴淚和熊丸髮因愁冗千絲白心與天盟  
一寸丹甲第崢嶸光闔闔綸褒燦爛映門闌而今節孝成雙美百  
代人從北斗看 邑志

題張貞節三首 錄二

徐渭 文長

三遷近俎苦霜時一尺殊恩湛露垂自古男兒嬰凶少誰家婺婦  
帝王知高齋客飯寧辭髮落葉寒機幾斷絲見說仙郎棲海曲更  
無魚鮓到塘西

青史他年定幾行太夫人傳在中央不須竊藥居明月自解將心  
結暗霜片匣遠飛鸞字重單雌親刷鳳毛長羅敷雖老攜筐在付  
與吳姬出採桑 邑志

壽濮遊擊四十 名師灼

王元美 世貞

千秋帶礪中原舊三翼戈船海戍長緩帶諸生談碣石飛書一箭  
下扶桑心因捧日常懸赤鬢為籌邊欲向蒼四十擁旌真謝掾從  
今更擬郭汾陽

致政歸過永安祠謁祖

濮天輝 堯華

六龍南幸駐吳山簪筆行宮鷓鴣班晉秩已霑新雨露爰居乍失

舊鄉關梧桐地迴瞻鳥止荆樹花分倦鳥還梓里于今成長壘千  
年蒙澤念維艱

解組歸來謁故祠大官寵賚薦椒卮卜居欲振丹山采讓產還賡  
棗萼詩遺有青箱傳奕禩曾將白筆寫宏詞半通偶綰蒙垂裕陪  
祀遙思扈駕時

送濮鴻臚入都應召

名天輝

戚元佐 希仲

錦轡春風奉詔初班曹新入大鴻臚玉螭漏靜傳天語銅鶴香消  
簡御書劍佩承恩容潤澤壺觴惜別意躊躇太平天子龍顏近衛  
玠當年也不如

贈濮鴻臚駕湖歸里

曹曾

鴻臚仙吏仕熙朝日侍天顏覲百僚衣染龍涎飄玉佩耳聞鳳管  
叶簫韶秋來易動尊鱸興老去難將泉石消從此忘機鷗鳥伴江  
湖隨地混漁樵

同戚符卿登福善寺佛閣

姚充 叔信

寶閣標雄鎮丹梯躡虛空晴原一以眺春日乍舒融烟雲滅蒼藹  
竹樹迴青叢市廛相合沓樓榭復玲瓏環流一水湛曠野千林通  
隨喜諧朋好參元究宗風少刺捐故宅兩師居禪宮 僧東溟月積  
庭居之  
善恒爲念崇福在厥躬世界幻塵外人天清淨中冥心自茲適觀



化入無窮

翔雲觀

紫霄瞻北極白嶽奉元君仙境何年闕人間此地分壇空常起霧樓迴欲翔雲恍若聞笙鶴乘遊已夕曛

幽湖泛月

岳和聲 石鍾

蘆陰疎復密柳色斷還連明月已如此長河益渺然淡宜西子載涼喜北風便數點鷗飛處歌聲起市廛

登福善寺佛閣

濮翰圻 衛廷

躡級憑凌意黯然儼登兜率望諸天雲光倒接低塵界海色平鋪

到法筵夜月機絲千劫地秋風禾黍萬家田早知龐老能空有其坐蒲團說往年

登翔雲三清閣二首

層雲高百尺虛閣正相齊戶敞龍飛入簷垂鳥下啼仙靈來紫府人語落丹梯稽首師尊處天風護舊題漫作天涯客空懷地主名瑤臺微雨濕蓬島彩霞明藥草傳神聖桃花遠送迎登臨思故業千古倍含情

禦兒乘月夜歸

濮孟清 子澄

霸功不共碧天長明月亭亭萬里光何處權歌悲越女滿溪清露

濕衣裳

題岳中丞鶴石居

釋智舷 輩如

名園真似畫圖間却喜人如鏡裏攀洲上有禽惟是鶴池中無石  
不浮山芙蓉一種幾千樹楊柳數株共一灣剛值皇朝頻有詔那  
容賢者暫偷閑首論餘烈天風黃卷思 與許天聖容容對出非  
吳越烽烟漲海昏城樓征客幾銷魂清平王路無分土雞犬桑麻  
自一村 以上紀聞

范蠡塢

施 恩

吳越亡來知幾秋黃蘆野水尙舍愁陶朱已自忘名去贏得清風

互古留 邑志

桐溪

程本立

梧桐陰清溪溪水波粼粼上有五色鳥下有黃金鱗秋雨洗白石  
春風生綠蘋願學羊裘子時來垂釣緝 府志

翔雲石

王文正

雲氣渺何處仙壇空有名五花雲鬢鬢一朵石崢嶸劍合龍津杳  
旛招鶴舞輕苔深春不掃摹碣寫金莖 府志

除夜

濮 煬 草堂

爆竹聲中一歲除呼兒今夜且拋書春風偏向山家蚤紅白梅花

覆短廬

范蠡塢

徐志云范蠡塢在濮院鎮相傳少伯泛湖同西施過此即今幽湖一帶俱是

曹旒

鳥喙深知不可親功成只合老江濱五湖賸有閒風月甘作鴟夷

寄此身

府志

桐溪一曲圖

楊述

桐溪一曲抱村流喬木人家溪上頭故老賸傳詩記在昔年曾見

鳳凰遊尋常看畫心先往七十懸車願始酬寒我平生饒訪古扁

舟三日為君留

邑志

雨窗讀書

仲宏文

漢明

一雨彌旬日清陰閑滿堂三春花市廢連夜竹風狂閉戶欣開帙  
憑闌喜對桑偶然翻閱罷池水漲滄浪

贈桐溪日者張宿之

顧問

去疑

知君自是赤松流偶作人間汗漫遊識邁九師元獨剖爻分三畫  
秘全抽清風入幕頻揮麈白日侵簾半隱鈞每與問奇開妙義百  
文常掛老鳩頭

秋夜憶連城校書

史漢良

圖南

秋風涼月思闌珊隔別紅塵一水看書靜芬芳疑醉蝶更深環珮

夢駭鸞眉消螺黛秋逾翠色比芙蓉秀可餐最是使人愁絕處羅浮香裏怯春寒

林中詩二首 錄一

陳其德 太華

地僻容疎豁交貧絕訪尋品茶添異味選石得知心  
放去愁腸冷閑來抱膝吟因君饒野韻林壑自鳴琴

同陳耳參過楊若侯新築

陸養正 青霞

斗室結成疑似舫冷人閑極淡如秋殘荷殆稿猶存致野果垂青  
小帶幽坐隱數聲林事寂黑甜半晌火雲收相逢莫浪驚初服鏡裏朱顏雪滿頭

春暮同徐雲章李雲門劉蘭舟堤上花坐歸登奇樹樓題句

四首 錄一

勝情隨地有囊澁減餘歡賴此幽居適延予隴首觀野煙荒樹合  
黃綺綠疇攢最是流連處清溪落照殘

輓濮道水

國朝吳 覲碧仙

老年忽忽暗傷神月下花前失故人天上九階登陟舊塵途萬事  
等閒新適符杏下悲麟歲 致年七十三 猶認濠間化蝶身 公名侶莊 道骨定

知蟬共蛻邇聞人見渡江津

公歿後有人見舟子載往濮院

秋前一夕過資福菴

鍾 山賓王

隔水聞人語紆尋已數重入門僧似鶴遶砌柏猶龍林爽秋先在  
庭幽暑莫容閒雲隨意變淡淡兩三峯以上紀聞

題濮川誌略

顏鼎受初陽

卓犖推前輩恢宏屬後賢挑燈終此夕開卷憶當年人豈文章重  
家因孝友傳他時名世出往哲在斯編府志

題濮思庭先生像

尤侗展成

古貌自翩翩衣冠更儼然言坊行作表器宇若澄淵豈嘗事修煉  
怡真率性天不必尋章句規矩遵昔賢神和氣愈靜德邵仰高年  
家世由來久貽謀知克傳紛紛蘭桂立裕後復光前嗟予隔帶水

未親笑語便典型尙不遠俎豆肅賓筵

訪沈海鷗

徐臻而庵

昔日在何處相逢俱老夫聞風先感激見面卽歡呼酒債近來欠  
詩壇久已孤自知無禮甚不敢更支吾

陰雨連日西水舟中立冬

吳廷樞寰中

雨慣鷗雙戲碧湍披蓑停著小舟看秋剛摧木收餘烈冬急將風  
報早寒烟柳暗消人鬢綠霜楓酣染客心丹松花對酒蓬窗下款  
乃聲中天地寬同一寧詞  
丈對酒

夏過龍潭贈佛眉和尚

濮淙澹軒

到此無炎暑清涼晝夜同坐深羣動息睡覺萬緣空庭滴花間露  
門迎竹裏風熟知空洞冷冰雪貯胸中

秋日過梅涇訪沈可員書齋宿雨二首

去歲連牀話寒燈照夜深雨敲殘葉響蟲泣亂秋吟喜在相逢處  
愁生離別心高齋良晤後寂寞到于今 蹉跎駒過隙老大轉悲  
傷良友松間月衰年草上霜對君如昨日回首即他鄉黽勉諸英  
妙精勤當自強 以上紀聞

濮川八景 錄化壇楓冷

霜落秋高夜正寒曉天木葉已成丹竭來禮佛臨初地未免經心

入化壇勅賜古禪衣錫在文留襄毅舊碑殘即看勝迹誰能識楓

變為人戴籙冠 邑志

題甌香圃

關雪先生新築甌香圃于東野命余書其額因賦詩以紀之

沈 機爾任

自鋤東圃命甌香囑我濡毫紀草堂座繞茂林時看竹門臨曲水  
暫流觴謝公豈負蒼生望邵老休誇翠巖長指日 鶴書騰谷口

野夫那得久徜徉 紀聞

懷宋景濂先生讀書臺

當年宋夫子此地昔曾來予也閒觀易空聞舊有臺音容流月露  
馨欵出風雷後起誰為繼千秋仰大才 府志

梅涇林屋

宋景濂先生游息處

碧草黃牛阪青蘆白鷺村雲霞野天合風雨柏松喧涇水平入檻  
硤山高對門昔賢聊寄迹今我作田園

邑志

題楊霖寰止齋

市隱若巖阿經聲繞薜蘿石頑頭也點鳥巧舌何多客至茶初熟  
詩成硯未磨羣公能知止進取更如何

五鶴堂落成

從來佛刹美南洲如此崢嶸曾見不鋪地鶴翎扶大厦潑空蜃氣  
護岑樓九天化雨開龍象萬戶人烟接斗牛定有神仙施斧鑿區

區何羨鬼工球

贈張參戎

彪

誰言徐泗空蕭條至今碧水流圯橋秘書在腹刀在腰橫行萬里  
無人撓將軍自是名家種騎馬出門觀者悚手誅羣盜如刈草綠  
林萑苻徒洶洶降楊修及擒朱倪琬弓直射硤山西軍威遠近呼  
韓范魑魅啾啾不敢啼

八景和宋景濂先生韻

錄西院纏霞

山房秋冷磬聲沉掃盡紅塵結道林林下只留霞幾片夕陽天際  
映孤禽

開一表姊丈嶧山解令歸

呂洽圓渚

清風兩袖別徂徠聞道攀轅飲馬來囊挾焦桐非嶧產舟攜馴鶴  
是仙胎漕渠首尾啣千艘岱色青葱徧九垓雅化八人無待問菁  
莪樂育幾英才

我鄉

我鄉耕作晚小暑盛栽禾料理蠶桑畢經營荳麥過青秧幸已長  
膏雨不嫌多蟬噪蛙鳴外遙聞牛背歌

濮川八景次宋廣平韻

錄四

朱盛時南陽

紺殿嵯峨聳舊楹給孤園有慧燈明青青古檜依然在一刹兼垂

兩院名

福善翠洽

同泛湖流一棹輕范卿應喚作陶卿朝來淚灑妝臺碧不道吳城  
是蜀城妝樓旭照

南薰吹送晚香飛葉底鴛鴦浴錦衣笑舉碧筒低寂照棹歌一曲  
採蓮歸荷塘晚風

幾陣淒風徹骨寒誰將血淚染成丹待教葉落秋殘後非色非空  
著眼看化壇楓冷

和宋景濂先生濮川八景原韻

錄二

濮龍錫九上

高閣凌虛俯斗牛嵯峨百尺望中留於今石丈歸何處嵐影遙從



海外浮翔雲高眺

浴罷鴛鴦靜不飛輕橈蕩漾亂紅衣折筍快飲池塘暮載得香風

帶月歸荷塘晚風

許烈女

許媛桐鄉柴窰灣農家女為強暴所逼忿恨自縊死時年十三縣令劉公鎰義之為文往祭因作絕句紀

其事

黃容叙九

松筠冰蘖凜持身蔀屋村莊有此人厲節維風賢令事表貞還與

勒貞珉

懋福壽禪林

鍾不彝紫錫

西村晝靜溪光綠信步閒吟溪水曲古寺荒涼不見僧寒醬獨自

啼修竹修竹寒醬日欲斜林梢濯濯散高霞漁舟烟火喧歸棹羨

煞雲山即是家

此詩亦見吹菴集

和宋景濂濮川八景

錄妝樓旭照

仲宏道改菴

館娃聞說嫁吳時寶鏡當樓對玉姿粉黛消亡千載後荒臺朝景

動人思

翔雲觀醮筵舞鶴紀異

泰時曾誇致碧雞何如白羽舞壇西王喬七夕緱山約忽有飛來

棲欲低以上紀聞

補鮑西溪濮川八景并序

元末鮑西溪宋景濂俱棲遲濮里製濮川八景詩題雖互異所指之處同也明初姚廷玉又為繪圖歌詠所有會稽陳先生序尚存集中而詩篇散佚景濂八詠而外他不可復覩矣仲子濮川人也因作五言以補之

市橋曉色

橋外全無市橋頭露未晞晨霞明隔浦初日映斜扉遠樹參差滴  
樓禽高下飛清光真可挹餘靄欲霑衣

林墅書聲

何處呶呶聲林間方誦習鳥啼驚未飛花笑落猶濕靜理悟自深  
樂羣業還集彷彿武城弦村村爭負笈

翔雲仙觀

仙都開壯麗高閣逼青雲聞有翔雲石時能吐赤文苔深餘靄積  
雨過暗泉噴羽客談經罷還看鶴鹿羣

落日招提

斜陽滿林薄一徑入招提已是僧歸定徐聞鐘滿溪月華伴禪寂  
雲水結幽棲此際花宮下真堪問指迷

南涇漁艇

南風吹渡頭涇水日悠悠網集驚游鯉人喧起宿鷗渚烟迎月上  
漁火落波流幾處垂楊裏清風聽櫂謳

西村樵唱

惟存西郊外山村自樂羣樵歌若金石爽籟過霄雲客去雲還暝  
人歸日欲曛閒吟曾過此里耳一回聞

幽湖秋月

秋水澄澄夜曳筇看碧霄幽湖千頃潔皎月一天遙波靜魚還躍  
更深桂欲飄今朝五湖上何處不良宵

梅涇雪霽

雪霽晴千嶺梅開香一涯溪光寒到牖樹色曉侵齋放鶴孤山與  
高吟祖詠懷名賢風韻在敢與俗人偕邑志

甌香圃示友

小築杜逢迎非徒遠市城豈從雨後綻笋向燕來生產薄官無擾  
家貧客解醒閒居曾有賦不作羨魚情

壽濮思庭先生九十

韓 菴 慕廬

君不見百六之山上接天千巖萬壑棲雲烟又不見陶江奔流東  
赴海山峽雲洲共湖漉山耶海耶高且深氤氳灑氣鍾長陵詩書  
傳家數百載紛紛紫綬榮華簪個中有客耽幽寂高臥東山採薇  
蕨荷鍤朝耕碧岫雲垂綸夜釣滄江月海雲山月了無猜秋菊春  
桃謝復開世間甲子多不管眼底俄逢九十來蒼顏白髮雙炯瞳  
高出商山北海翁稱觴戲綵羅圭璧陶江雲谷迴春風噫嘻哉人

生何必萬戶侯亦何必識韓荆州但願歲歲年年如此日壽山福海同千秋

鴛湖權歌 一首

朱彝尊 竹垞

春絹秋羅軟勝絲折枝花小樣爭傳舟移濮九娘橋宿夜半鳴梭攪客眠

蛇蟠石

府治東徐少卿祠有苔石奇古土人目曰舞蛟傳是花石綱所遺然至元嘉禾志明柳炎鄒衡趙瀛三志皆不載未析所從來按元慈谿黃玠弁山小隱吟錄有為濮樂閒司令作蛇

蟠石歌樂閒家濮院意明初產入官好事者移置此地耳安

擬李白更九子山例書之禾錄 曝書亭詩集

石以舞蛟名未若蛇蟠古試誦弁山吟圖經猶可補

頌桐邑徐子一明府 周瑄 季潤

徐勉丰標冠六朝如公才氣又雙超征輪特緩溝中瘠拔士時收爨下焦無限春風開繡陌數年化雨浸桐郊感恩敢謂從隗始駿骨風生慕義遙

西溪隱居

徐發

玉堂辭祿隱溪橋豈學柴桑憚折腰祗惜高年難事主願為聖世

一山樵 以上紀聞

濮院坊

濮 洙 聖源

樓臺池閣路重重錫以嘉名宋理宗惋惜到今呼濮院尚留雙柱

誌遺踪 元末與宅俱燬 尚存兩石柱

金銀麵杖井

祖氏初散時以二杖投井後有開者舉手輒斃

井乾夜氣識金銀遺杖難求往事湮應有精靈呵護在不教攫取

付貧人 誌略

樵李城

劉志云在濮院之西濮院即古樵李墟也桐鄉徐志云以其地產佳李故名府志云案樵李今已無跡可

考至元志謂在嘉興縣南四十五里則其地當在嘉興桐鄉之交或以為盡屬桐鄉亦未必然也

繆 泳

空壁岩堯路不齊沙場南望故城西闔閭歸國諸軍盡風雨猶聞

戰馬嘶 府志

止齋贈霖寰居士用壁間韻

釋位惺 佛眉

知止即岩阿無心買薜蘿樹凋霜色老菊密晚香多白日閒中度

青山靜裏磨唯君知此意不必更如何

重過水木菴

適意開新徑偶然移舊扉霜寒人自老秋暮事多違葉落青桐瘦

盤飧白豆肥空巢憐去燕曾共百花飛

五鶴堂五首 錄一并序

丙午秋將建大悲閣築基之三日有五鶴自雲中來飛舞旋空良久月明之下觀者如市僉云閣成之兆迨至庚戌閣始落成因名之曰五鶴紀斯堂瑞也

幻寄何殊結旅亭林林殿閣插天青雲移碧落窺僧定日映丹梯

照客升山聳峽峰回北斗水來天目遠東溟非徒氣象誇雄壯萬

戶鐘聲夢自醒 以上紀聞

濮瑞源翁七十雙壽

胡會恩 南茗

南極雙懸碧漢星氤氳佳氣啟雲屏鸞卮並進璫為液鳩杖同扶  
玉鍊形遶膝蘭芽爭奕奕環階芝草自青青佇看

綸誥從天下萊舞躡躑慶大齡 家乘

自桐鄉至濮院舟行二十里夾岸深林茂樹清幽可愛口占

四絕與碧巢

沈進 山子

出郭迤東正午晴小舟欹側御風行麥枯豆坼蠶成繭桑柘陰中  
見太平

溪橋晝畫掩籬門處處縹絲不出村野老看人漫停櫓綠波翻動

小魚輪

粉瓣檀心葉底藏刺花開落拂衣香水楊陰下清無暑細語黃鸝  
白晝長

欲尋深隱臥溪山咫尺雲林未擬攀何日把茅苦老屋留君小住  
萬松閣 府志

嘉禾雜咏 錄一

盧存心

宋錦人傳出秀州清歌不用舊纏頭如今花樣新翻出海內爭誇

濮院紬

國界橋 府志云草蕩即古吳越戰場有國界橋

繆綏武

蕭疎兩岸荻花齊荒草淒迷日影低行過野橋分國界朔風猶聽

馬酸嘶 府志

歸舟

濮映康 豐玉

歷亂雞聲動四村晴雲低鎖月光昏十年歧路無知己依舊塵埃  
進陡門

孝廉叔仲宣讀書梅涇次韻

濮龍雯 飛藻

吾宗靜養處一室蔽泥垣過雨蒼松潤和風春鳥言醉眠憑竹榻  
吟嘯有梅軒莫厭頻來往詩書重本源

梅涇漫興

陳曾祉 鴻園

梅花涇畔是吾家機杼桑麻亦足誇戶口較於他處盛鄉風自覺  
此間奢燕來玉長春籬筍雨後溪肥小斲蝦臘甕開時招好友談  
書說劍夜喧譁

濮川舊迹

吾里在春秋時屬樵李吳越往來孔道蓋卽戰爭地也今舊壘遺踪漫漶不可識聊以其傳於故老者詩以識之

樵李亭 在梅涇南四里

茅亭來往息樵漁此是當年樵李墟  
士卒殘骸雖化土兜鍪朽鐵  
尙驚鋤一時螺黛傳西子  
千載鳴夷弔伍胥極目平原桑柘綠  
題詩剩有野僧廬

范彖塢 在幽湖南有藏兵塢洗足灘等蹟

越壘吳疆古戰場悲歌不盡弔滄桑  
荒榛煙合藏兵塢斷渚波分  
濯足鄉破國早知烹走狗補牢何至泣  
亡羊功成一舸浮家去野

水年年冷夕陽

胭脂滙 粧橋尚存

清流百丈市橋西旭照妝樓俯曲堤  
紅入口脂春露滑綠添眉黛  
曉山低鏡臺咫尺傾吳國畫檻須臾  
傍越溪千載芳踪共憑弔桃  
花水漲亂雲迷

雙節塚 唐氏龐氏濮彥仁妾也明永樂間遭家難經死合葬唐夫人橋

金谷瓊筵日笑歡一朝家變最辛酸  
畫樓對泣雙紅粉明鏡分飛  
兩碧鸞園剩土花春雨沒玉埋荒塚  
暮雲寒至今流水聲嗚咽如  
爲貞魂訴夜闌



宋景濂先生讀書臺

涇上春水碧重林色蒼蒼聞昔宋學士讀書梅花莊長松蔭頽簷  
瘦竹圍短牆當時孰來往云是劉與方經綸佐廊廟著述堆琳琅  
一代推鉅儒千秋重瑤章徘徊石橋畔曲折涇水長梅花自開落  
歲歲懷孤芳

同人集幽湖

平沙漠漠路紆斜小集簪裾水一涯明鏡已空西子閣片帆猶憶  
大夫家樽開殘日依芳草棹倚微風看落花妙筆龍眠如可得後  
來又作畫圖誇

過楊解元父子墓誌慨

張其是 文韓

解元墳近石橋邊翁仲當風立野烟休恨春秋虛祭掃家家攜酒

滴君前

墳今無土  
明棺纍纍

未婚守節詩

為朱蕭氏楊翟氏作

憤然一死豈云奇矢志從容不易為繡閣未親夫子面泉臺得保  
玉人姿孝姑以外真無事飲蘖之餘絕所思先後兩扶名教在濮  
川共識女宗師

濮川古蹟

錄梧桐林

濮履中 丹棻

梧桐林外景蕭蕭鳳去桐枝半寂寥千古只餘橋畔月尙憐荆棘

借鷓鴣以上紀聞

桐香室懷古

沈堯咨山臞

梅涇一水清且漣梅涇古蹟人流傳漢氏仲溫喜學道棄官直欲  
從所好延訪山陰楊鐵崖築室事之晨夕偕宋劉江鮑時未遇曠  
世天才於此聚鐵崖古筆著鐵史四海聲名蔚然起老擅風騷壇  
坵開一時星聚何盛哉吁嗟乎只今憑弔聲塵滅惟有梅涇之水  
流不絕邑志

讀書臺懷古

何處讀書臺潛溪不可作相傳未遇時避亂此村落朝瞻嶺頭雲

暮看松際鶴汲古何深深百卷抽祕閣兼有千樹梅晴雪恣吞嚼  
故人來江鮑酬唱亦不惡至今花午詩邑乘載鑿鑿先生命世才  
屈護偶寄托誰知帝者師風雲此發腳我家十世居百年安以樂  
臺名空有聞老梅已索寞把杯憑弔問遙林烟漠漠邑志

香海山房瑞禾歌

穀號有百皆良稷嘉禾自古推第一率育有命粒丞民疇云能稼  
不能穡高僧好事課經餘漬種偶從淨土植淨土連生十八莖一  
莖九穗雙歧出秋高露重穎垂垂稔稔甲蒼黃密以粟復見二穉三  
尺強生機弗絕比如櫛不勞耘耔功不藉桔槔力惟有和風靈雨

滋庇以慈雲兼慧日造物愛此豈有私特賜農祥豐稔吉

過故莊有感

曉行水南村樹樹籠煙雨寂靜無人來春禽坐樹語

贈蠡洲內兄二首 錄一

南甸稱良牧干城任一身雙旌敷雨露單騎靖風塵功與參山峙  
名垂湘水濱王公筆記在強力挽千鈞

寄呈陸聚侯內翰

憶昔挹眉宇時在歲己丑詩繫方告成網羅無遺笱博徵表前賢  
下及梅涇叟風騷仗扶持不愧一巨手我鄉當宋時作者尚希有

濮氏世其家元季盛賓友宋楊曾寄跡篇什傳誦久明推顧去疑史

南陸臣此外無其偶時遠集難求何從知好醜茲編始

國朝徧訪諸耆耄落落故紙中往往失世守及今不收拾是則誰之

咎爰與同志輩採之慎分割聊以存梗概豈能開戶牖詩派分宋

唐近日交相詬殊途各揚鑣不問似某某卷帙積未盈家數略如

右三都憑元晏其文傳不朽先生著述家學者宗山斗倘弗遺葑

菲一序弁簡首老嗟會面難敢藉徐生雲門口吳地無風詩願附詩

繫後

雙賢橋訪桐香室遺址

張宏牧 恕夫

泛泛幽湖水泠泠走石橋蒼松臥礪底碧枯千層霄緬懷雙賢人  
已過五百春桐香讀書處湮沒蔓荒榛潛溪先生工文辭閩中肆  
外疇與比一朝有旨來江南博學羣推帝者師茂州安置夔州死  
不及鐵唾著鐵史鐵唾隱居七者察此地應來濮氏招飄飄雙飛  
下羽翰至今雲物常光昭道旁却有海鷗廬海鷗聲塵亦茂如徘徊  
弔望感今昔吾衰已久憑誰歎沿溪修竹幽且邃倚竹臨流坐  
忘悴超然不覺一指頤清陰面面飛寒翠

施韋莊四十初度

鍾 梁 來 霞

芸窻自壽有名篇字字清新塵俗捐往日操觚推鳳逸曾選巽近

功名時不至入世心已嬾何時脫塵鞅看山步行緩君亦同此情  
共嗟來日短高歌出門去長衢路坦坦

花笠四首 錄一

沈履端 坦如

矮棚結就奪天工不是漁翁是圃翁虧得秋菱春筍足藤牀臥到  
日頭紅 濮川詩鈔

訪宋景濂先生梅涇讀書址

邑尊 舒 瞻雲亭

日午吏事散弄舟清興發涼風送白蘋蕭蕭滿巾鞵遺跡問村童  
婆娑入林窟荒臺委荆榛一徑清陰豁緬維宋夫子精廬坐兀兀  
讀書慕孫登文抱建安骨風雲與時會珥筆侍禁闈煌煌玉堂仙

樹立何清達惜哉蕙苴疑遂遭天帝罰余也窺陳編異代得津筏  
幸茲托微官訪舊撫殘碣誰爲祠粟主薦以南山蕨如聞絃誦聲  
閉戶待霜月 府志

桐谿雜咏 錄一

當時避地有詩翁曾與金華角兩雄試問讀書牀在否行人指點  
野田中 邑志

去任答紳士

卜義明

貧仕漳南地羣賢得序賓萍踪非汎合蘭臭喜同心去路仙山遠  
離情湘水深那堪踰梁嶺回首溯晴陰 紀聞

題桐鄉余明府青芥園

屠嘉正

恂齋

味淡莫如畦中菜氣烈莫如菜中芥淡則清兮烈則剛維清與剛  
遠俗脈桐鄉令君黔中來青瓊甘載神不憊苞苴屏絕耽藿藜種  
菜青青滿官廨紫陽爲貽青芥圖箇中氣味誰能解介然之胸辨  
澠淄介然之守恤凋瘵菜根日齧百爲果菜色絕無萬民快我觀  
此圖轉自箴薑桂之性何可壞與君共勉矢清剛報

國無他在匪懈人世紛紛競寵榮繙書且凜官邪戒 府志

夜宿香海寺聞鐘

周呂桐

虞封

達觀得失亦何希靜入梵宮坐翠微高閣鐘聲聞夜半恍如棒喝

悟禪機

叙徐烈婦事

楊 煒 赤雲

徐家寡婦真奇烈慷慨一朝死夫節夫為偉長之冢君少從余游  
 資性少棄儒一意事經營奔走東西少停轍結褵彌月生病危灑  
 淚對婦訴曲折婦言不幸罹禍端願畢所從如一切從此相顧各  
 歛歔一朝離別手永訣縞素蓬頭倏歲餘時節歸寧心似鐵父思  
 別嫁生異謀拒之不能力已竭滷鹽一杯私自吞不明所以獨結  
 舌一死光明可謝夫生同牢食死同穴悲風慘戚白日昏徐婦徐  
 婦女中傑紅聞

吳越戰場歌

極望平原數十里茫茫春色為誰綺烟迷野草綠無垠亂落桃花  
 泛流水地在桃花里西南相傳吳越舊戰場當日靡旌且摩壘英雄氣奮  
 屬夫差踴躍交鋒決橋李越兵夜宿千人陂千人陂為越王宿兵之處造飯平  
 明埋金錡走馬岡頭忽起塵吳王曾走馬於此故名太宰申胥相瞪視鼓聲

震炫駭奔雷一往桃弧共棘矢奕奕旗旌柱脚麾奔突三年不敢  
 止此時殺氣正憑陵此時士卒盡爭死至今常過國界橋猶見愁  
 雲半空起精魂飄蕩苦無依月白霜寒悲不已土人為說耕鑿時  
 敗甲朽鏃出泥滓往往陰霾火燭天霹靂聲聞徹遐邇不堪慘目

弔興亡多付烏鳶并螻蟻吳王霸業易銷沉句踐寧忘會稽恥府志

東荒夕望

馮允秀雨遂

夜涼蓮葉淨香浸一池冰蛩續人聲靜月涵秋氣澄疎慵曾謝客  
寂寞又思朋徒倚柴門望孤村露遠燈

讀書啓明樓示諸生五首錄一

楊燮爾梅

嘗思文字樂忻幸欲起舞窗明竹几淨筆山停墨譜注水研赤硃  
細喉蹲瓦甃義軒有遺意搜剔異訓詁羹牆見聖哲不僅在八股  
清泉一夜雨源流出深塢借茲灌溉功濬此虛靈府藥石療寒脾  
制方不按譜君子有三樂第一從頭數幸值 太平年普天歌率

土莫怨一瓊寒偷兒弗入戶莫謂資性下願學參之魯讀書難復  
難有力各自努

延古堂桂開次濮北三韻

陳光裕芬佩

桂開香盈頭桂落香滿腳開落有常期但愁風雨虐又須防稚子  
攀折爭相攫延古一大株年老未斧鑿花時天喜晴高枝手難摸  
繁葩色粲金芳氣細侵鬪自笑支離身百年何處托深秋坐君齋  
殘卷學蟲嚼涼風開幽襟寒月清孤魄對花頻傾盃吮毫詩以作

徐貞女詩

我鄉有蕭翟守貞歸夫家服食安淡泊終身無疵瑕玉質久化土

清風猶未遐徐女今繼之此舉人爭誇讀書識大義奉姑禮有加  
檢篋焚舊製矢心殉泥沙

歸自桐鄉途中口占

雨過桑畦潤風來麥隴香  
深村人寂寂忙殺養蠶娘

府志

映水纒花白飛香故惹人  
繁英掃地盡留得一枝春

蛙打田田鼓鶯吹樹樹簧  
宮商成一部送客過桐鄉

鄉村殊可戀况際夏初天  
籬竹抽梢直江梅落樹圓

邑志

送武姚二兄教諭寧海二首

錄一

濮光孝 行先

蒲帆從此發錢塘水渡山行路  
正長天姥峯頭眠月影玉京洞口

采芝香搜羅萬狀供吟嘯  
長養羣材作棟梁只恨春風兩地隔  
池塘得句更誰商

淨土菴訪桂二首

錄一

碧玉枝頭金蕊盈小山招隱聽新盟  
看花却憶人千里空對一庭明月明

遊指南菴

遠林雨過一翻新曲徑風來不起塵  
莫道儒冠妨俗眼且尋僧舍豁愁顰  
米囊花發金堆粟心鏡臺空白映人  
聞道三眠桑葉急鄉村處處少閒民



小羅浮懷古四首 錄一

曹士勳 菊田

女兒橋下泊漁舟遙指梅涇古寺秋  
聞道花開千樹雪一時人號  
小羅浮

題朱節母楊孺人夜紡課孫圖 孫卽舉人曹鉉

彭啓豐 芝庭

繞屋書聲和紡聲夜牕燈火伴殘更  
綿延一髮留先澤引得春暉  
照百城

錢陳羣 香樹

紡車靜輟課宵深一盞寒燈淡夕陰  
今日披圖憑指點孝廉未盡  
報劉心

古銘過訪幽湖旅次

潘亮 燭微

遯野 各鄉 陳夫子遙臨客舍間  
不談當世事只問故園山夕照  
蟬吟樹秋風雁度關感時更思越  
坐看鬢毛斑

雙松圖為沈卜甌尊慈濮孺人壽

陳梓 俯恭

我欲畫老松旁著小松樹小松列兩行  
烟凝翠連羽持來壽東陽  
東陽有賢母苦節四十春冰霜甘白首  
白首抱丹心秋風孤雁吟  
寒礎搗明月空外送清音清音徹紫霄  
應憐毛羽凋抱雛實辛苦  
雛鳳成九苞九苞初覽輝一飛一回顧  
念母不得去私情急反哺  
反哺夕陽下雲深晚山赭願回魯陽戈  
上堂奉杯斝杯底酌流霞

筵前舞雪花繞膝孫與曾索棗紛喧譁老松更百年小松多參天  
年年當臘日歌此節孝篇

題劉貞女事迹

貞女戊辰沒後六年鏡奩中得手書云婦女從一死無二  
逆父不孝從父不貞願天早賜病亡若吞金服海投井懸樑  
更傷父母之心矣乾隆  
十二年端午日午時記

未嫁守志貞女劉遺迹如新六載周上言逆父爲不孝下言從父  
亦不肖皇天曲賜兩全法一病黃泉水歸峽三十八字字道貞  
女能文吾黨羞人間八股須眉生可能增減一字否嗚呼劉公此  
女抵百男白頭無子云何慚我曾立傳今題詩千世百世傳誦之

貞女有靈知不知

秀州沈貞女

深谷孤生蕙靈泉別有源寶珠明自晦良玉粟而溫許字纓先屬  
知名誼早敦麻衣愁結緒藤枕淚編痕終服當元日哀詞告二尊  
孝思延喘息誓已絕養殮弱質綱常繫貞心節操存爲將彤管紀  
不覺肅吟魂

養蠶詞

田家養蠶極苦辛蠶大費力小費心臘月十二蠶生朝炒鹽獻竈  
家家勞清明夫婦莫走動隔夜採花浴蠶種蠶種不一分炎涼熱

看冷看須忖量屈指來朝穀雨近出城買紙糊蠶筐轉綠變藍蠶  
 子出鵝毛担落房中藏先以嫩葉如乳哺頭眠三日魚鱗鋪二眠  
 兩日連極枝眠眠插替勞何辭每眠三日換出老葉謂之替蠶今年二姑把蠶穩  
 不如大姑昏昏小姑狠出火一錢二百倍大眠一斤五斤外如此  
 收成定十分割肉先獻蠶將軍掘筍勿叫筍叫筍蠶要損喫薑勿  
 喚薑喚薑蠶要僵況今天時頗溫和微風拂拂雨不多雷驚沙脹  
 更何慮人力到時天豈誤大眠以後廣送葉老翁提籃小兒挈不  
 愁葉貴只求飽四十二餐一齊考熟腹通曰考山棚灼火真小心起望  
 山頭白皚皚三日齊封門五日始採繭一斤採十斤合家開笑臉

前村後村絲車鳴伊伊啞啞聲相聞或歎白肚娘上山一半殭或  
 恨出火早蠶了葉又了四鄉各比並只有我家好我家雖好勿喜  
 歡地丁昨夜來催完豪家復要蠶罷米今朝撐船泊村裏官糧不  
 抵私債苦一石冬春還石五賣絲分完兩手光一月替汝空奔忙  
 落得繭黃績綿線織得綿綢一丈半去年無襦今有袴畢竟蠶桑  
 是長算不恨官私兩迫促但願年年如此十分足放膽且喫豪家  
 粟

幽湖沈烈婦歌

張宏範 崙表

沈家新婦項家女嫁得沈郎命真苦沈郎生來命不長新婦一慟

摧肝腸人生聚散何太促一刻能將百年續誓與良人同蓋棺新  
婦一生心事完良人有母幸強健良人有弟望黽勉妾身不死將  
何爲何用人間戀殘喘手持盃酒上樓去地下相從見夫面君不  
見東漢曹家之婦夏侯氏千載芳名歷青史如今項氏一死真洒  
然省得提刀截兩耳

雙節

爲姑母曹表嫂沈作時載入郡志

雪髮疑千尺冰心共百年仰無慙白屋下可報黃泉貧賤甘荼蘼  
晨昏藉粥饘好憑採風使苦節爲雙傳

正月下浣里中補元夕燈極盛觀者如堵二十八日漏下數

刻驟雨爭道蹴蹋殞十四人斷肢毀體不可勝數作踏燈

歎傷之

歡笑出門去連翩踏燈市春風錦棚下明月珠簾裏球綵炫奇巧  
彷彿魚龍戲童叟互扶挈士女紛爲履趨趨游手徒剛壯喜觸觥  
驟雨趁狂飈濤聲壓檐死遂使平坦衢忽作阪峽比掉頭轉折間  
立錐已無底壺公豈可學有身乃大累一夫偶失足百夫共波靡  
積人如積薪肉山平地起馬革不相及鴻毛擲一死本非古疆場  
輿尸何爾爾可憐歡樂場哀歌同蒿里紙錢與麥飯招魂淚如水  
不見紅燭光青燐聚殘鬼

幽湖竹枝詞十五首 錄五

近來風氣學蘇州，執鬧真如大馬頭。南北兩京十三省，滿裝行李

買花綢

馬燈旋轉活如龍，粧點元宵大不同。記得前年大街上，笙歌裝入

綵球中

壬辰元宵作燈以大綵球藏伶童四五輩奏樂其內

夢年裹粽近端陽，燕子啣蟲哺子忙。打點下田車水種蓮朝，梅雨

好開秧

鄉人呼種田為開秧把梅雨為種田水

三日中元暫歇工，兒郎都在觀西東。盧家三白梅家肉，瓶袋烟筒

買箇空

賤買新絲貴賣綢，暗中托庇仗神麻。今年土地家家大，一片歡聲

拽木頭

歲晚酬神盛者稱大地祝獻唱神歌在旁和之曰拽木頭

懷五布衣并及石東村

福建雷鉉翠亭

五布衣廌青山人李鐵君名錯陳石閭名景元朱抱光名敷陳嘉謨名策皆北人陳俯恭名梓浙之嘉興人東村名永寧今少司馬觀補亭之父也按陳梓餘姚人居濮川

我獲布衣交邂逅，五君子久知廌青山。幽芳殊凡願願言採其英

潛見不異旨，因之訪石閭。矮屋擁書史，落落談古今。貧哉病以死

更有抱光君，被褐遠金紫。一室抱微尚，古琴自悅耳。三子臭如蘭

何幸不我鄙，且得兩陳君。考槃各永矢，一在北之廛，一在南之埃

北學宗洛閩屢空無外累南學共源流貧亦正同軌老矣均無兒  
 弟子供滌滄我造北陳廬牀竈雜杖几南陳會鴛湖答拜人扶起  
 合之以石閭三陳堪並峙三君未盍簪我乃得躡履抱光云近朱  
 鷹青曰御李鷹青與南陳神交頻托鯉試問與北陳握手當何似  
 爰有石東村鷹青忘彼已石閭與抱光東村輒倒屣東村以子貴  
 不獲布衣比我懷五布衣并作東村誄亡者杳莫追存者勞予跂  
 潔身各有歸相期惟一是以此訂知心石交亦足喜天下豈無人  
 渺然思彼美

寄懷陳古銘

順天李 錯 鷹青

仲弓綽有古人風草澤衣冠範越中十月盤鵬爭搏擊千金岑鼎  
 自磨礧經生肄講餘紗帳漁火衝寒有雪篷手折梅花寄烟水冷  
 香消息一江通

濮川八景

錄荷塘晚風

沈孔鍵

南谷

一片晴波儼若耶年年消夏與無涯高枝柳接低枝柳紅藕花交  
 白藕花隔岸水田蛙兩部過橋野市燕千家何人記取當年事畫  
 舫金罇泛落霞

梅涇曲十首

錄三

曹錫秬

明月夜出五通廟流光飛上九間樓樓頭好女新妝束醉舞狂歌

不解休

五通神康熙中易其像為東嶽廟九間樓近廟右今已燬

聚寶港邊苔蘚合碎金橋頭榆葉飛春衣未製冬衣典北客不來

西客歸

誰家多買密花綢大利重洋信可牟便待收租斛底裏恣教賒穀

確坊頭

涇上田最腴三方阻大水俗呼為斛底裏

梅涇雜咏十首 錄三

曹氏珩 崑團

野橋梅萼白迷離花底清樽任我攜劇愛蔚藍天色好園園插徧

最繁枝

幽湖之東有橋名白鶴多紅梅花時往遊焉今已摧折盡矣

十笏閒房萬樹梅古香常繞讀書臺橋邊碧水清如眼親見前賢

風度來

垂垂玉樹照清瀾賺得雄蜂欲抱難唐突故應嫌俗客憑君取影

恣教看

梅涇有照水梅其種絕異花開朶朶下向無瓣仰者

續鴛湖櫂歌百首 錄三

朱麟應 梧巢

斷橋曲水古桐涇一棹夷猶破綠萍不及阜林塘上路抽帆直過

女陽亭

佳果移根野寺栽古城百雉沒蒿萊紅桃似鬪西施艷猶向臙脂

滙畔開

夜聽鳴梭出遠村家家紡織古風存入城草布知多少半是桐鄉

半陡門

舟過濮院

汪

筠

珊立

楊柳人家儘日烟  
鶉鴉聲裏路  
泗沿橋頭沽酒尋常慣  
鳥喚提壺似去年

嘉禾百咏

錄三

濮啓元

顯仁

好風習習鳥關關  
卜築晴溪水一灣  
香滿梧桐涇上路  
傷心豪俠剩清閑  
桐香室

百折寒泉漾竹籬  
沿溪夢綠有遺枝  
雙賢橋畔閒吟處  
留得風騷

八景詩

梅花涇  
以上紀聞

霧縠輕飄舞袖香  
翠翹初試內家妝  
一奩秋鏡螺紋現  
還憶金釵

十二行

西施妝臺  
府志

題方苴園淞水攀留圖

吳

瓊

文溪

淞流解纜興悠然  
五兩風輕好放船  
惠愛寧論膺一命  
攀留漫擬借三年  
歸來松菊猶彭澤  
老去詩篇似樂天  
世味幾人能擺脫  
五湖秋水渺如烟

皂林懷古

沈鍾泰

虞尊

日夕停舟野渡口  
振衣登岸一回首  
古驛長塘南北通  
天陰鬼火出林阜  
憶昔倭寇橫行時  
此間結壘議攻守  
一朝決鬪雌雄分可



笑疲兵多束手主帥臨危不顧身居民盡室望風走興亡轉眼百  
年餘垂堤空見青青柳耕人幾輩拾遺鏃血痕隱現鐵垂朽賈舶  
漁舟紛往來桑畦茅舍連前後不須望古添惆悵蓬窻且盡尊中  
酒 邑志

妙智王節婦詩

周世堯 欽表

東陽風節舊烏衣索句分箋為表微半載同牢驚逝水百年殘鏡  
泣孤幃到頭有子家無恙立志於貧世所稀一曲迴塘小橋畔松  
筠深翠指雙扉 邑志

決烈歌 并序

沈 宋 則菴

烈婦吳氏嘉興南門外民家女也適濮鎮三脚墳吳文高子  
吳雲海為養媳雲海家貧事織烈婦操作以從事舅姑至孝  
姑歿事翁如父歷十年舉子女各一子甫六歲女襁褓雲海  
忽患瘵疾烈婦晝夜侍湯藥願以身代壬午秋九月雲海年  
三十三復染時疾而死烈婦撫子女矢志自守翁謂烈婦曰  
余年逾耄伯亦癯獨依人賃織豈能兼顧欲奪其志烈婦知  
不能守以子託其妹越九日臥搯其女遂自經年二十有三  
歲癸未余客濮川細訪其事作歌弔之且望集珠玉以彰烈  
婦冀垂不朽云

秀水三百里水秀來天目山靈分靈氣烈婦鍾而有婦年及笄適

吳生吳生雖貧骨格清八門操作勤相夫洗手作羹奉舅姑姑先

翁歿翁年耄事翁如父彌盡孝詎知一旦喪良人煢煢藐孤家益

貧伯氏支撐力食艱四壁蕭蕭空馨懸翁謂青年宜早決烈婦聞

之眼滴血有女呱呱襁褓中恐遺黃口累老翁矢志自經節不改  
 與女同死死無悔有兒存祀心亦安有翁有伯相撫看九原不復  
 憐饑寒由來節烈死如歸氏死隨夫志不違心如冰骨如鐵寒光  
 皎皎堅且潔生同室死同穴芳塚淒清照白日嗚呼古來富節易  
 彰貧易沒為作歌兮歌決烈所天傾兮天無情妾義重兮輕死生  
 秋霜冷冽寒原肅獨挽綱常振頹俗

鴛湖櫂歌

譚吉璠舟石

斗門水勢到今平兩岸條桑鳩婦聲料峭春風帆飽滿微茫烟樹  
 露金明

聽雨軒鴛鴦湖櫂歌

陸以誠和仲

女郎年少舞腰纖滙畔燕支和露黏最是鳳仙花色艷染來玉指  
 透紅尖

分得南湖水一彎澄林濮市綠迴環它鄉名士爭來集如此樂郊  
 應早還

濮綢光滑勝湖絲花似嘉綾巧並傳小女湖邊來濯錦鴛鴦對對  
 水中眠以上紀聞

國界橋懷古

吳奕傳葵園

綠波春漲草橫鋪抗想當年舊霸圖帶劔受禽推死士揮戈取屢

憶靈姑西來越嶺朝飛瀑東去蘇臺夜集烏割據兩雄誰是久夕  
陽無語下平湖

觀西寺趙文敏書古心禪師半葬碑有感而作

西院西偏路已荒殘碑仆地幾滄桑開山衣鉢隨流水侍講詞華  
付夕陽幸不模糊文可讀恨誰鑿削字重傷吾來憑弔空搔首仰  
視浮雲入混茫

語兒亭 春秋時越王入宦于吳夫人從道產女于此亭

濮起進思

草青青  
語兒橋畔語兒亭聞說雕欄繞綺櫺吳越興亡成往事只今惟見

松月寮 楊鐵崖有記

孫士熊 驥陽

豈是深山裏偏宜掛隱瓢閉門春寂寂觀易夜迢迢月照一心淨  
松羞百卉凋道人自遺世寧為少弓招

讀書臺 宋景濂先生讀書處

沈杰 秀東

未樹經綸業營臺倚水涇鴻章心表赤名士眼分青夜月珠幃下  
春風玉騎停金陵人去後花柳為誰醒

沈杰庠生所刻有緘菴詩賦一卷

小羅浮

沈仁 醴泉

花開如雪小羅浮載酒偏宜月夜遊惆悵寒梅無一樹小橋流水  
自悠悠

唐夫人橋

俞本焯 蘭輝

烟波不復駕長虹遺址荒涼蔓草中試問當年雙節塚落花無語怨東風

朴樹灣

在大街東有漢節婦劉氏貞節坊

鄒士龍

借陸

百丈河東朴樹灣我來憑弔夕陽間昔年坊表今安在剩有閒雲往復還

臙脂漚

鍾錫齡

省園

臙粉殘脂一鏡中當年想見笑釐工浣紗古岸無人問拾翠沿溪有路通眉黛映來春漲齒額黃散後暮烟空只今橋李亭邊過三

月飛花帶雨紅

題濮珊園先生松陰晏坐圖

錢人杰

藪盒

落日薄松林濤聲秋欲沉石經苔齧瘦竹為客留深坐久翠生袖詩成清到人至今三五樹猶作老龍吟

輓濮蘭臺名孟堅字數班

柏三錫

承恩

濮氏之先賜院於桐

濮氏世居梧桐鄉宋理宗賜其第曰濮院

亦越乃祖名重南宮出

宰楚粵導揚仁風惟我蘭臺自幼多能

蘭臺精篆刻工書法善吟咏

讀書窮理

祖武是繩年纔弱冠學業日增徧覽時英無所推許人或與交亦不相拒脫略禮文但稱爾汝座客常盈門庭如市心照神交惟我

與子交未三年嗟今已矣子之侔儻可方正平子之貧窶不減長

卿其家益貧其志益潔乞假於人夷然不屑人若有過不憚面折

愚者懷怨知者喜悅仰惟二親客居齊魯欲往從之嘆身無羽翼

夢連宵逾增愁苦君云今春多異夢恐父母有恙不勝憂慮形體魁梧襟懷曠達如何

斯人而有斯疾赴試不中謂當暫別詎意臨歧遂成永訣嗚呼庭

桂森兮蕙帳寒君齋前有老桂一株係數百年物去年賦七言長句見示中有襲用昔人去年花落顏色改二句余

曰此屬詩識不宜用今果又成讖矣送子歸兮梅涇灣赴禾時語余曰我死當葬梅涇余因請於其族得遂其願

黃土一抔埋玉樹何時華表鶴飛還梅三錫號月枝桐廬生家貧力學嘗注隨園集著有多師

草惜  
早逝

漢川八景

錄福善翠冷

沈謙益原名

寂寂禪林小市東涼雲滿地綠陰中夕陽芳草蘼蕪遠不礙觚稜

一角紅

補編

寄懷蘭雪堂

蘭雪堂仲改菴築

陸費錫

冰心散作四時春吾道於今有一人雨灑鳧山慈是母月明桐里

肅如賓非關栽柳存高致直溯傳薪抵大醇蘭雪堂中塵自遠湖

光雲影倍怡神邑志

自浮石橋歸途即景

蔣紹輝適文

遲日郊原得得行春燕青入麥田平逕穿花草蜂爭釀路繞林園  
鳥乍鳴蠶葉濃時村巷靜水流窮處野船橫行吟至竟緣何事骨  
格羣憐太瘦生 初陽存稿

濮川所聞記卷六

胡珠船先生

金淮曉瀾

濮承鈞政衡

張文韓先生原本

濮鏞雖宣

岳洙傳魯源

楊蔭軒先生

述

雜識

石門陡門

唐以前自杭州至嘉興皆懸流其側水草沮洳以達於海故水則  
設閘啓閉陸則設棧通行古胥山碑謂石棧自錢塘北抵禦兒之  
胥口乃其証也至今有石門陡門之名而其迹則埋沒於阡陌久

矣 趙郡伯府志

禦兒

禦兒見春秋外傳及史記越絕至更始時始出養女名亭之說與  
酈元水經注引黃武六年產兒能語事及朱長文圖經所辨西施  
產兒之俗說同一妄也

句踐令范蠡取西施獻夫差於路潛通三年始達吳因生子名亭  
語兒此俚俗之說也陸廣微以入吳地記又云西施亡吳後復歸  
范蠡同泛五湖而去此一舸逐鴟夷之妄也廣微乃託於越絕之  
書不幾重誣先賢乎 吳郡伯府志

濮院鎮 府志秀水縣

濮院鎮 縣西南三十六里其南接桐鄉縣界舊為濮氏所居故  
名 大清一統志 舊名永樂市 柳志 元至正間惟右族濮氏一姓迨濮氏  
流徙他卜居者漸繁今可萬餘家因以濮院名鎮南隸桐邑之  
梧桐鄉北界本邑之靈宿鄉居民務織絲綢亦業農賈商旅輻  
輳與王江涇相亞而俗較馴謹多業儒 秀水任志

濮院在梧桐鄉縣東北一十八里古樵李墟也宋建炎以前特禦  
兒一草市耳自濮鳳卜居後六世孫斗南以援立理宗擢吏部  
侍郎詔其第曰濮院淳熙以後樹桑蠶織輕紈素錦日工月盛

元大德間名永樂市召民貿易構屋開街鎮遂以名明萬歷中  
改土機爲紗綢製造尤工擅絕海內其他姓卜居者前有貝劉  
燕朱後有楊馮施樂亦皆科第蟬聯人文日盛非他鎮所能並  
也 桐鄉縣志

### 宋徐龜年別業

鎮西徐一作齊家浜宋徐龜年別業也歿後卽葬於此其墓今廢爲  
某氏宅乾隆年某氏造屋掘得墓誌按邑志云徐龜年字朋老登  
淳熙丁未第宰江寧專務德化歲饑甚制帥黃文昌委以荒政躬  
行阡陌家賑人給全活者衆嘉定間守肇慶陞辭論君德之要在

剛明上悅治郡清淨除監察御史抗疏首言士大夫之邪正實關  
風俗之美惡又論名器至重今外之闔壹給白帖而假官稱徇私  
情而耗公廩涇渭混淆賢能解體乞嚴禁約上可其奏已而因病  
求去除直華文閣知溫州改徽州力請祠歸優游吟咏有澹軒文  
集

### 大桑

濮友梅家梅涇之北屋後有大桑一株高數十尺不便摘採歲時  
棄葉過半淳熙三年四月中忽有青蠶叢生葉底俄而生生無數  
葉底盡成繭如卵蠶婦繰之得佳絲以織一境蠶桑之利自是日



盛識者謂此實開之 誌略

樂郊

當元之季漢仲溫父子居漢市豐於資集一時名士為聚桂文會以文卷走者五百餘人請楊維楨評其優劣日相酬和稱樂郊云

節錄朱竹垞曝書亭集徐一夔傳

楊完者之亂

元至元丁酉苗帥楊完者統苗獠洞獠答刺罕等劫丞相塔失鐵木兒屯駐漢院據僧寺為衙舍近居無賴投作嚮導抄括院境擄男女老幼皆殺之壯者曰土乖驅以為奴民房之受燔燬者什之

六七蹂躪既極而闔闐機杼杳然散去者歲餘庚子秋僞周兵至除之離竄之民招使復還力艱起業者給銀穀相佐組織遺風稍漸振 漢溪志草

元紹貸糧 元紹一作紹元

至正丙午張士誠遣部將朱暹等屯兵三十萬於舊館壻潘元紹駐兵烏鎮稱欲保安西浙明太祖命徐達常遇春結營東阡與張兵水陸鏖戰擊敗其師于烏鎮于皂林斬其將甘院判獲其眾六萬士誠復遣其將徐義統赤龍船來援糧盡遣元紹貸糧十萬斛於漢氏戒諭游卒毋得侵掠故自漢院以北由皂林直抵平望屯

營百里標掠四出至元平章丑的長壽見執而嘉興始降市鎮鄉  
村殘毀已甚獨濮院幸獲寧宇 桐溪紀略

附記釋本黃濮澹軒先生傳洪武初明遠公鑑聞太祖起兵攻  
張士誠捐粟萬餘石助餉家得保全後因嫁女過奢太祖微行  
見而異之命其家族七十二支分徙而居焉

嫁女事

禾郡湯濮二姓宋元時以著閩互相姻媾洪武二年湯氏嫁女濮  
院奩賸紛陳觀者如堵適太祖潛行見而駭之因混迹儔眾以至  
濮院備訪富盛隆旨分遷 湯允元湯氏家譜

附記 濮澹軒述祖詩云七十二支徙無再宿註云因嫁女於  
角里湯姓者過於奢侈太祖微行時見而異焉遂命分徙

張宗道遇仙

隆慶間有張宗道者以打線為業寓翔雲觀西廡事元帝甚謹一  
夕聞殿上云明且八仙祝帝誕當洒掃伺之張驚寤詰旦候之有  
八丐至時方上巳所攜有新荷葉輒悟所言叩首求度八丐笑而  
頷之使閉目須臾聞風濤聲張亟開目見大海汪洋遽求返仙笑  
曰汝本無仙骨與鐵釘一枚屬每日需錢觸地可得但不可過求  
耳後歸途漸近釘漸短慮不敷用覓冶工製之甫入冶如燎毛然


于是乞食而歸已四五月矣今三清閣下有八仙像皆其所見真形也

瑣志參紀聞

雙瞽之報  
隆慶中鎮有濮氏之甥沈愛孫者臥於樓夜半啓窻向北溺須臾視明星光大如斗遂成雙瞽百藥無效抱真公以此事書於堂壁并錄感應篇涕唾及溺與夜起露坐等語粘以示嚴戒云

紀聞

須公遺愛  
吾邑四平無山陵川澤之間土滋田沃宜黃白稻民間所植秣一而粳十其大較也然每穫輒有赤米雜於其間雖歲去之來年復



如故越境卽否竊嘗疑之以問農叟叟歎曰此須公遺愛也予曰如何曰萬歷戊申夏五月大雨田疇淹且盡民以溢告公撫慰之勸以力救不得已則棄田之已種者而存秧浹日雨不止度其勢不遺種乃豫遣典史賫庫金若干夙夜進告糴種於江西而已則行水勸諭且請于三臺御史乞疏免今年田租以安民心十餘日穀歸分四境糶之教民爲再植計月餘水落而秧已長民猶疑之將種黃赤豆以接食公曰無爲棄穀也益勸民樹穀其秋穀大熟賦復減十之七民以是得全其生者甚眾他郡邑弗及也是穀晚植早熟不刈則隨落後雖他植厥種恒在田間歲復歲不絕須公

名之彥南直隸人萬歷間進士累官光祿卿卒于家 紀聞

須公字君美號日華南直嘉定人萬歷丁未任桐鄉知縣糴種

江西或云江北泰州見張楊園先生赤米記

吳宏濟秀水縣新建四鎮常平倉碑記 節錄

循新城南行越陡門十里而遙為濮院於桐鄉當走集其人十農

三賈十九苦旱十一苦澇其田宜麥禾多樹桑兼菽視原沃所入

其儉倍差中旱傷麥禾乃受之饑其廩倉中市而立厥面陽厥形

方凡為儀門若耳房若堂廡若社弟子學若連廩房大抵皆如王

江涇之數 儀門一兩耳房各一夾道東西廩十有四為堂廡三夾堂廡為社弟子學各一 其東西鄰及于

南為吳氏殷氏沈氏北抵畝澮縱橫度可盈五百尋歲時旱澇中

饑糶半廩大饑糶全廩計每版穀五千石於四鎮餘二萬石計平

糶二萬石可令價無翔二十餘萬石以時灌輸

吳宏濟字汝楫秀水人萬歷丙戌進士官湖廣道御史贈光祿寺少卿

鬼求掩覆

濮堯明名炳生平豪爽死葬曾祖墓側十有三載若子若孫皆相

繼歿絕萬歷辛丑清明節從子維垣掃墓見土崩棺露心為惻然

私念當俟臘底一為整葺而卒不果癸卯歲五月某日維垣父堯

光患瘧臥榻忽有排闥而入者迫坐枕畔連呼長兄我是濮炳特

來懇求堯光訝曰炳死已久汝是鬼耶曰然詢所求泣曰痛我棺  
 槨俱毀當此霖雨上漏下濕苦不可言為我掩覆誠大德矣堯光  
 曰爾何獨來尋我鬼曰鴛湖已死自台來求長兄况二姪客歲有  
 此美意故敢相懇長兄可自問也堯光許諾鬼即辭去既去復回  
 曰長兄知否我家不肖弟已死鹽官矣言訖寂然蓋指其親叔林  
 之子也林子素習無賴為宗族所擯不知所之計已經年鬼之見  
 報非無謂也堯光大異令僕亟召維垣詢其事維垣駭甚曰然吾  
 意未嘗出口彼何知之嘻亦異矣掩齒埋骨誠為盛德事况宗族  
 乎觀此尤當惕然

盜樹之報

白六都濮子奇祖塋古柏合抱崇正癸酉有族人夜盜數株出五  
 鬣淫風雨大作舟樹并溺半載間闔門俱死後有列衣冠者誤為  
 其僕從憑亦往圖之見祖穴中現一大頭鬚眉畢具驚駭而返不  
 十日主僕俱死聞者莫不汗下 以上誌略

連蕙蘭

妓連蕙蘭因事繫獄以書干岳石帆云含羞羞婦亭前獨語語兒  
 溪畔岳為致當路釋之一時傳為佳句 紀聞

盜劫濮鎮

邑志云順治三年大盜楊燿宇等焚劫濮鎮晝夜橫行青鎮亦搶攘米價騰貴

陳其德土寇橫行記節錄

丙戌四月十三日天方初明忽報有船百餘從陡門而來延濮鎮市河泊定便家家搶擄滿載而歸兩岸雖環聚如林喘息不敢動自此寇一試遂遍地縱橫而起矣船以百計人以千計將晚鼓船如雷縱其所之聞者心膽俱喪如此者約有十日餘無論大戶小戶晝則居於屋夜則宿於野天色未晚便攜老孳幼四顧傍徨不能待旦而若輩至黃昏時逐一搜劫米麥衣飾視爲長物卽有銀

錢藏之奧窟無不一空夜夜放火處處延燒濮鎮數萬家半成灰燼甚至白晝招搖以好惡爲予奪說此家可保則衆寇斂手或稱此家不可保則衆寇怒目甚至擄室女孀婦莫可誰何幸而張斗瞻控府道領官兵爲剪滅計亦可謂救時良藥也丙戌歲季夏松濤居士記 紀聞

藏異

余聞之先人云昔南新街有趙華南者家鉅富有術士竊議其後必餓死聞者駭之趙亦自謂適遇落魄藉金汁度日亦堪餬口因取所蓄白鏹鎔成大錠鑄鑿姓氏分十三桶密藏地窟懼盜劫也

無何貨船往來沉溺失事者累累各處典舖同時焚燬索償者踵至傾家不足發藏又成烏有備嘗艱苦遂至餓斃翔雲觀山門下後有閩人攜貲發買鎮綢顯然有華南鐫記始知藏移閩中早非趙氏有矣噫術士之言可稱奇中然或早自警悟力行善事藏銀雖能不脛而走安知不可挽回萬一耶

瑣志

### 虎災

梅花村畔百里盡平原也無猿啼豹嘯之聲豈畦間偶見獾兔則羣起而逐之歲丁亥秋冬之際猛虎入我西郊其逐犬也不啻餓狸之搏偃鼠其襲人也不啻婪獺之嘍細鱗獵網難搜居民竄伏

沈海鷗鵝笑軒詩序

### 杜癡

乞者杜癡行歌市中未嘗作乞憐態與之錢不受若與莩骨羊髓無問生穢必噉盡得濁酒盛破缶立飲設不與或詬詈之嬉笑而去嘗經旬不得食市中富人致大門六昇者每二人試呼杜癡笑曰我來我來乃作二縛取大杠肩之而趨或偃水澤仆草萊雖風雨暑寒毒蟲猛獸竟無害行乞幾二十年容色炯煜忽一夕死於蕩所蕩旁十餘家聞鼓樂聲施芳楊燮有傳

紀略

### 南新街觀燈

康熙庚子正月南新街燈彩大盛觀者肩摩踵接惟見燈光如晝  
夜景清明樂而忘反無何風狂雨驟火滅棚摧簷溜成渠進退無  
路遂至前人失足後人山倒哀號之聲四振而糜體絕曠者不可  
勝計至今南新街氣象蕭條人煙冷落數十年不能復振瑣志  
按鄭耕餘燈市紀異詩云折脇斷臂不知數馱歸死者百餘家  
又云路旁尙有屍橫臥檢點猶餘十三个讀之不勝慨然乾隆  
己酉西河演劇觀者聚於涼棚下棚忽傾有壓死者有足爲棚  
所壓倒懸於岸而死者有身受重傷扶歸而死者至於斷肢毀  
體不可勝數可慘殊甚各坊設水龍以防火災癸丑五月二十

日試於會龍漾觀者聚於長木橋橋欄忽傾溺死者數人洵可  
哀也附錄以爲好事者戒

### 吉祥草吐光

里中潘龍章家吉祥草一盆夜忽吐光陳謹堂詩云俄然瓦缶中  
奇光閃青翠奩開寶鏡懸盤走明珠對又云馳聲漸及遠狂呼百  
千輩縣宰下檄取置之公堂背荻書樓稿

### 重修香海寺千佛閣碑記節錄

香海寺千佛閣重修於雍正之某年告竣於乾隆某年之某月日  
朱氏一人之手朱本農家極信佛捐其家募其里黨得數百萬緡



經理其材物工匠之費落成請余文爲記

關帝廟碑記 節錄

乾隆丙寅歲鄰人不戒於火夜半昏黑中延燒數十百間疾風捲至廟牆壁椽瓦俱燬明晨視之煖閣自若也且美髯飄飄火何難至仍自若也立時議出錢文計數百萬鳩工庀材不幾日間丹黃黝聖煥然一新

義塚記 節錄

甲戌乙亥間荒疫頻仍遺骸徧野余爲首捐囑僧朗閩募力而埋頭顱全具者且千計吾鎮東西朔南分爲四區區各一塔後來者

聽其投入毋費毋阻 以上方學沆文集

柏茂枝

柏茂枝居燕場之北孑然一身以織爲業所賃屋祇一間精于布置區而爲三中客座設几一方桌一椅八皆與屋稱左爲臥房房之外爲書室室不過數武亦設書案其製光潤可愛硯石花插水中丞無不相稱右爲爨房設行厨飯罷卽撤去了無烟火之迹矮窗甕牖限于地則薛花木掩映之入其戶但覺芬芳滿目而已客至烹茶欸洽器具精良令人徘徊不能去亦解吟咏陳古銘李聽翁諸先生樂與之遊座間圖書滿壁出入衣冠楚楚不同常人殆

隱子織者歟余嘗屢過其家知之最稔故爲附記于此瑣志人

甘釀和

有甘釀和者精堪輿往來濮川爲顧氏擇地葬南樓先生之祖焉地在濮九娘橋西水自坤方來至卯方聚一漾墓後皆蕩地曰後人可入詞林但一世而止耳其言果驗他如周孝廉若谷朱錦堂瑜山兩孝廉祖塋皆出其手

夢中贈畫

嘉慶四年夏石門方蘭坻先生過梅涇下榻濮珊園家時年已七十餘矣未幾旋里卒九月間上舍鍾振容春潮夢先生語之曰君

事母以孝聞余向畫大士像并書心經於其上君虔取供奉可延母壽覺而語珊園越數日偕往石門述所夢於先生之子鐵珊鐵珊聞而色駭曰果有此畫但素無知者今於夢境傳之亦神矣哉出而歸之鍾

濬河

嘉慶甲戌夏五月少雨市河漸涸取水必至市外運水一擔得錢二十五六月初旬里人各處開濬水得漸進香海寺水周四隅每歲黃梅時鯉魚出入其間水中終夜有聲近已淤塞惟餘東北隅一潭相傳爲龍潭故址堪輿家云潭之通塞一鎮風水所關七月

間唐上舍月山偕里中諸善士暨主席天池募緣疏通費及三百  
金於赤日督濬不自惜西北隅鑿土至二尺許復得一潭徑丈餘  
土柔滑楊蔭軒先主撰重濬龍潭碑記 以上漁艇紀聞

